



贈太僕寺卿候補知府刑部員外郎竇少梁府君墓誌銘

并序

君諱元灝字少梁姓竇氏邳州人其先世自山西沁水縣遷居



傳十餘世至曾祖良秀家始豐乾隆五十一年歲大饑捐貲施粥鄉里有善人之目祖照四父象彝附貢生候選員外郎置義田千畝創立義塾以贍族人並課其子弟讀書有司聞於朝建坊旌之配莊恭人生子三長元渾次元清君則其季也幼孤母莊恭人獨愛憐之君生而孝友童子有成人風不恃親之愛稍凌其兄也而兩兄亦深器之年長即委以家事君善承先志勾工建義坊延名師入義塾兼脩家廟春秋享祀維虔凡宗族

鄉黨之來求助於君或干以事者慷慨應之鮮有難色俾各如願以償邳之人無不重君者弱冠補博士弟子員兩應鄉試不售入貲為郎籤分刑部時仲兄元清亦以拔貢生官內閣中書舍人昆季遂奉母居京師君雖入秋曹終以未得科名為憾獄之暇手不釋卷習制舉業攻苦如寒儒咸豐元年舉順天鄉試旋補員外郎缺以母莊恭人嬰疾思還里君偕仲兄乞假奉板輿歸未幾而軍事起粵寇熾於大江之南皖匪擾於長淮之西徐州則當其衝所屬蹂躪過半君言於仲兄曰賊勢如此必將及我毀家紓難捍衛桑梓即所以報國也仲兄是其言君遂以團練自任捐資募勇出粟築圩鄉人皆踴躍從事防守立備

九年之夏皖匪渡運河北竄台莊官河窪灣諸鎮皆失守而君所居獨無恙十年自春徂秋匪又兩欲渡河君隨署邳州牧張君富年前任邳州牧周君力城先後會合邳邳宿三州邑五十餘圩練勇據隄固守賊不得逞者再大府獎其勞 奏入奉旨服滿以知府用賞戴花翎蓋君甫奉慈諱不得已墨經從戎移孝作忠志逾堅而氣逾壯已十一年七月賊竄入山左九月回巢取道於邳攻上灘圩上灘乞援有言賊衆不可往者君奮然曰同盟而不赴非信也在難而不急非義也會袁端敏公督辦剿匪事檄候補道張君汝梅駐兵邳州君往請得于叅將振甲一軍同往先是君約各圩之勇來接應及官兵與賊交綏而

各圩多後期賊大股虜至衆寡不敵戰二日遂及於難時則九月十七日君之原配莊恭人生女一適崔繼配宋恭人生子鴻年甫六月猶在襁褓也事聞贈太僕寺卿世襲雲騎尉建立專祠君之兩姪鴻謨鴻書於大灘之役俱從君作國殤邈卹如例濬頤曩官京師與賢昆季交甚篤喜鏡泉舍人之坦率和易而尤服君之機敏善斷豪邁絕倫花晨月夕過從罔間及濬頤奉諱還鄉君時馳書奉慰問乙卯再至京師則君昆季已歸去君死難之日濬頤在嶺南久不得音耗甲戌三月鏡泉挈舟至邗上握手欷歔出一編見眎曰此家弟死難事畧以其年十一月初八日葬於白溪之西君最知弟蓋為誌其墓嗚呼

與君別二十五年而不相見乃僅一見君之兄讀君之狀殊可悲也然而君固不朽矣銘曰  
溫々儒生治軍旅以身報國得死所君志未就名終古厥後必昌天佑汝幽宮有靈鑒斯語

朱蓮塘封公墓誌銘并序

公諱宗潘字蓮塘又字霞汀姓朱氏先世與徽國文公同祖至  
中孚公由婺源遷涇之東鄉黃田遂世為邑望族曾祖廷衢

貽贈通奉大夫祖學灝考一定俱太學生 誥贈榮祿大夫妣

胡太夫人生子二公其長也性孝友宅父憂慟幾絕遂媻勤奉

母母年九十有六始卒公已逾七秩矣號泣擗踊猶如嬰兒弟

宗璵出嗣析居時分財贍恤之家庭之內雍、如也幼而劬書

喜吟詠熟於史事居恒常引為法戒以家道中落棄帖括操鵠

夷術歷游湘鄂閩粵吳越間束躬勤儉遂致饒裕慨然曰儻來

之物苟而不分是守錢虜耳顧散亦有道縱意揮霍以為豪舉

吾亦無取焉於是壹志為善建義倉立義學置義山義田見義必為常若不及於鄉邑修柳橋河浙溪湧溪三石橋於長沙修官道暨長壽街大路至數百里於平江修龍門義口兩橋兼造航以利濟於廣東佛山福建延平江蘇江西河口等處置漏澤園設育嬰堂所至為眾善倡江右兵燹後歲游饑餓孳載途溝瘠枕藉爰自湘鄂購運米菽以振之并分路資遣流亡全活無算先後收瘞骸骨六千有奇平居施藥捨棺給衣散粥無虛日遇族黨艱於婚娶喪葬者厚飲之各如其願扶持顛危排解紛難善言善行難更僕數矣初喬公松年撫吾皖諭地方捐輸為善後計公季子記名道守謨以父命倡捐喬公義之專疏請獎

奉 特旨賞給三代一品封典誠異數也公益感勵既率邑人修復學宮復獨力建郡學閱四稔糜四萬金始落成中丞英翰公聞於朝廷 天子以公急公好義命地方官給銀建坊以示嘉獎焉綜計生平善舉所費數十萬金無吝色亦無德容故篋財五十餘年時聚時散而故業不加增少患咯血比老轉強健歲時孫曾奉觴上壽公掀髯環顧怡然自得美意延年其斯之謂歟以同治庚午八月初二日考終於家距生於乾隆庚戌九月二十八日壽八十有一道銜隨帶加二級 誥封通奉大夫以四子守謨貴 晉封榮祿大夫崇祀鄉賢祠元配王夫人繼配趙夫人子四長守誠王出早卒次守訓候選同知加知府銜

賞戴花翎卒守謙候選同知加知府銜守謨 記名道俱

賞戴花翎趙出女二孫男十四孫女四曾孫一王夫人已別葬

於也家嶺今以同治十三年十一月 日卜葬公於洪村都

西山卯向加庚申以公從弟景唐通政與濬頤齊年通籍屬為

文誌幽乃作銘曰

躬善人溥厥利子象賢繼厥志歆俎豆名勿替後有述視此誌

汪太淑人墓誌銘并序

濬頤與孟餘給諫同館同臺性情相洽曩官京師朝夕過從深

知堂上太淑人持家教子以慈母而兼嚴父而孟餘奉親之孝

至老不衰尤為儕輩所推許洎乎持節嶺南量移邗上與孟餘

別凡十五年歲必通問上叩起居孟餘書來輒道太淑人神明

強固耄耋游臻每一開函為之色喜乃甲戌之夏太淑人赴至

則黯然悲吾孟餘遭此鞠凶也秋杪孟餘奉太淑人匱歸里濬

頤往奠之嗣孟餘持狀來乞濬頤誌墓不敢以不文辭按狀太

淑人姓汪氏系出於歙後乃占籍江都父象衡公太淑人幼嫻

姆訓溫恭靜淑年十九歸於贈通議大夫莪衫謝公逮事尊章

以孝稱謝氏世掌文滙閣書莪衫公以候銓府通判不樂仕進  
終日枕藉其間太淑人女紅之暇日佐繡帑雅得倡隨之樂道  
先甲午孟餘舉於鄉丙申莪衫公下世太淑人年已四十有六  
家中落乃躬操井臼勤儉刻厲課四男子下帷讀書攻苦不少  
休迨庚戌孟餘以進士第三人入翰林聞捷之日正太淑人六  
旬周甲之辰里人榮之顧東南方構兵廣陵不守太淑人以咸  
豐癸丑避寇興化流離轉徙安之若素壬戌由海道間關入京  
師板輿迎養而孟餘始得舞綵承歡十三稔於茲矣自甲寅以  
來夫孫曾男女三人季子殁於里中孟餘又再失其伉儷太淑  
人屢櫻憂患達觀善遣怡然渙然晚乃究心內典惟以焚香禮

佛為事今年三月十五日卒於京邸年八十四歲比殮面如生  
將以十二月十五日歸柩於莪衫公之兆禮也莪衫公已有前  
誌世系具詳例不再書故第述太淑人事並男女婦壻孫曾所  
系悉牒於左以備刊石與阡表異焉濬頤竊惟歐陽文忠公瀧  
岡阡表其述崇公之懿也壹本於魏國而不著魏國之內行並  
史傳所書畫荻事亦概從略蓋意在表揚先德故惟主於崇公  
文章家立言體制應爾也然不有賢母令子曷底於成今觀太  
淑人內行純全幾乎上追魏國而孟餘在諫垣有直聲固亦  
步趨廬陵者也孰謂古今人不相及哉孟餘能秉母教以博榮  
名而揚其親雖耆年冷宦不改初服行見大有設施為國家用



予以下太淑人之遺澤孔長也銘曰  
是為女宗彤管揚芬亦云壽母梵夾證因相夫劬書訓子登第  
衣食是力福德兼備躬膺翟芾疊晉鸞章歸真淨土積善餘慶  
幽宮合窆邗溝之側用勒貞珉千秋垂式

常鎮通海兵備道李君墓誌銘并序

廣陵與潤州南北相距才四十里中橫天塹而觀察使分巡常  
鎮通海兼督揚由關樞故其治在廣陵自大江以南立通商馬  
頭設海關監督俾觀察使任其事遂駐於潤州廣陵被兵治久  
廢然使者有權征之責則必時往來於大江以北也李君叔彥  
於同治辛未仲冬履任君之大父觀察公故與先大夫有齊年  
之誼叔彥又與家弟子嚴道光已酉同舉優行濬頤官京師日  
以兩世同譜得訂交於君喜君之來把酒絮話春明故事為  
我作一日留因與君約常相見也自是三年中君以事至廣陵  
予必觴君於待月謬予以事至潤州君必觴予於皆山樓癸酉

八月十四日為君五十初度予偕諸同人登焦山松寥閣為君  
介壽甲戌三月君亦泛邗溝為予稱六十觴君小子九歲體兒  
豐偉才識恢宏方冀其宣力 朝廷游躋開府曾幾何時而君  
病：竟不起耶嗚呼君明決能持大體於中外交涉之事遵守  
條約不激不阿故商民咸帖然服矧孳、為善愷悌慈祥以理  
決之報施必厚乃甫逾服官政之年而遽奪其算天道尚可知  
哉君卒於甲戌八月二十九日予既過江哭之君之仲兄夢蘭  
率其孤肇文遷君之匱至廣陵厝於天甯寺僧廬將以乙亥之  
冬還鄉安窆而先以狀乞予志墓予知君最深烏可無一言  
以表其幽按狀君諱常華字叔彥號韡齋先世由山西洪洞遷

居河南之鄭州遂占籍為曾祖煌廩貢生祖國瑞舉人官至江  
南淮揚河務兵備道崇祀名宦鄉賢父慶揚廩生官江南徐州  
府同知三世皆以君貴贈榮祿大夫曾祖母朱氏祖母楊氏魏  
氏母沈氏皆贈一品夫人兄弟四人長錫華早卒次翰華次寶  
儉亦卒君其叔也道光甲申八月十四日生幼而穎悟少長逾  
下帷攻苦年十八補博士弟子員甫舉優行即登賢書庚戌遭  
贈榮祿公之喪癸丑沈太夫人復棄養君皆哀毀骨立喪葬盡  
禮咸豐丙辰援例以主事用籤分戶部時鈔票案起君鈎稽詳  
慎上官獎其勞奏入 報可君以一人主貴州司稿而兼理軍  
需捐銅兩局以及豁免處督催所捐納房衆務心維口畫紛然

就理諸曹司罔不服君之敏斷焉辛酉兼充總理各國事務衙門章京兩署趨公寒暑罔間君彌奮勉克稱厥職同治甲子充錢法堂主事乙丑補雲南司主事其間以金陵克復辦理捐務屢得獎叙迨丙寅復奉旨以本部員外郎遇缺即補丁卯遂補福建司缺君之為錢法主事也直園法罷敝之時籌買銅斤開爐鼓鑄擢員外例得請代畢侍郎道遠重其才留為幫辦錢法之有幫辦蓋自君始戊辰偕理藩院郎中志剛查辦恰克圖稅務數月即畢事稱上旨晉三品秩交軍機處存記以海關道員用庚午京察一等又以捐銅局勞勩賞加二品頂戴辛未七月拜常鎮通海道之命十月復以前在鄭州本籍勸捐

修城功荷翎枝之賜君下車之始即廉得揚由各關向有充白役者假偷漏薦越為名多方婪索罰捐至數十倍大為商賈之害出示嚴禁之吏胥慄不敢因緣為奸積弊頓除而國課轉裕美國領事某性乖張商民交怨君白諸總理衙門俾美國公使易之揚子江心風浪最惡操瓜皮艇子以濟人者殊不足恃印須之涉時有戒心予與沈仲復觀察議設義渡甫有成說仲復移節滬上而君繼之遂各捐廉奉為倡並勸諭商賈捐巨款以作義渡久遠經費郭外新河兵燹之後淤塞不通君力主開濬請於大府以利行人焦山向設救生總局而大港亦有一局適當圖山要衝因乏資將罷之君為籌款接濟上下游賴

以無恐太平洲界乎常鎮揚通四府州之間在江中窳峙延袤八十餘里洲民惡習養女即溺之仲復創立保嬰局君踵成其事留養女嬰至四百五十餘口其他鄉鎮皆仿而行之丹陽境內江灘民人懇種易啟爭端君議收其田租以供書院及各善舉之用課桑局則先為借款采買並委官設局教民育蠶嚴冬散米以濟貧窮君躬為表率檄郡縣垂諸令甲海門俗尚火葬並劫嫠婦再醮皆按治之不少貸壬申冬征丹徒二區鄉民洵不靖君密陳於大府委前宰丹徒之田太守祚拘為首者數人懲之其亂遂弭君坦白和易與人交洞開城府從無急言遽色而操守廉介絕不可以非義干天性孝友伯兄早歿無嗣遣

所生女依嫂氏鄰下以博其歡心仲兄夢蘭典郡吾皖告歸迎之至署家事無巨細悉聽裁決恭兄友弟同僚並欽慕之慷慨好施當其官農曹時凡鄉里之應京兆及禮部試者舉有所贈其無力出都者亦必攸助之及擢外臺求者愈衆君則周恤備至且視人之能否能者留以為助否則資之就道親戚待以舉火者蓋以百數十計君卒之日皆哭失聲君配任氏 誥贈一品夫人繼配韓氏 誥封一品夫人先君卒子女各一任夫人出是年十月二十日卜葬於岳家寨先塋之東從形家言癸山丁向銘曰

君師我友溧陽侍郎弟先師死云胡不傷：哉君師偕歸蓬島

晨星黯然我躬則藐哭君未已又哭君師我欲問君知乎不知君之所苦折腰弗慣撒手而行永脫羈絆慈航普渡佛感名洲三山墮淚去思長留邳城之西幽宮是宅千載不朽視此貞石

董燧臣封翁墓誌銘并序

濬頤與策三農部為文字交始相見於嶺南即服其篤厚樸訥夙秉過庭之教迨同治己巳來揚州則策三已乞假歸里因延之入淮南書局並預修揚州府志策三於編纂之暇輒挈舟還孟城定省孝思藹然形於辭色既心欽之復聞高郵人士言燧臣先生抱道講學貧而尚義故其子得成進士惜乎濬頤之近在邳江未獲一親杖履也而又深重策三之壯歲辭榮循陔孝養為不可及也光緒初元孟春策三遭先生喪將卜葬持狀眎濬頤丐文以埋其幽按狀先生姓董氏諱丙元其先為元集慶路人至正間始遷高郵三世祖璘前明翰林侍講學士以忤王

振罷歸見明史劉球傳曾祖綏國子監生妣王氏祖有臺州附  
學生妣胡氏父之鏞州附學生妣吳氏皆贈承德郎贈安人先  
生嘉慶十三年七月二十一日生家本寒素幼入塾讀書聰穎  
異常兒母吳太安人以紡績佐饗殮晨興遣婢持綫入市易餅  
代炊綫或無售者則日昃不再食率以為常先生雖饑餒而佔  
畢無少休父侶簧公尤鍾愛之二十一歲舉茂才以年資貢入  
成均先生為制舉文力宗先正法程手鈔周秦諸子史記漢書  
文選唐宋諸大家文擇其精者裝為巨冊高三尺許字畫端整  
丹黃爛然十應秋試俛得復失者三先生了不介懷門下生徒  
請業者先後幾及百人皆有聲黌序或擢科第以去而先生獨

偃蹇一衿將終其身乃不於其身於其子報之且親見其子成  
名先生可以無憾已先生心性之學受之侶簧公嘗曰孝弟忠  
信本也文藝末也故其內行完粹事大父母父母以孝聞伯兄  
月樓先生下世遺孤尚幼飲食教誨俾於所生與人交洞開城  
府真誠無妄言動必軌於正有背乎義者則面訶之聞一善則  
稱揚弗絕於口人咸敬而感之平居慷慨負奇氣有經世之志既  
不見用於時顧殷然以仁民愛物為念惡衣惡食省嗇所入藉  
周貧乏族鄰中月有廩歲有餼待其舉火者凡數十家見人妣  
妣問所苦委曲周詳過於人之自謀遇急難毅然引為已任不  
計利害鄉里交頌先生先生愀然曰吾曾大父曩市炭得遺金

舉以畀失者有司榜所居曰還金吾曾大母冬月以已之絮衣  
施貧者吾大母以新襦進越日而又施也及吾父恪守祖訓好  
施如故不以貧廢故三世皆稱長者吾敢望先人乎先生遘疾  
孤寒來問者輒四出祈禱請以身代古所稱鄉先生歿而可祀  
於社者嗚呼先生其無媿哉先生官候選訓導以子對廷貴  
勅封承德郎 覃恩誥封奉政大夫配宋氏 誥封安人生子  
三伯即對廷乙丑進士戶部廣東司主事次觀廷次倫皆州附  
學生孫二增福增第先生卒於光緒元年正月初五日春秋六  
十有八易箒時訓其三子曰熟復四子書自有無窮裨益又曰  
儒者當以天下為己任匹夫匹婦不得其所古人恥之若苟竊

名祿非吾子孫也觀臨終教子之言先生之品與學洵乎至純  
且粹已以某月某日葬某為之銘曰

封公有德貽令子箕裘無忝式穀似嘉言懿行在人耳目游臺  
畔空仰止溯洄從之覽湖水鯁生謏陋慙作謠云紀實行匪溢  
美

二知軒文鈔

定遠方濬頤子箴

贈內閣學士前署安徽巡撫安徽布政使吳公墓誌銘并序

公姓吳氏諱坤修字子厚號竹莊江西新建縣人曾祖一崑母何氏祖嗣葵母李氏父敬炤母葉氏三代以公貴皆贈光祿大夫母皆一品夫人公家素貧未冠即橐筆走四方嘗由山左而吳中而嶺南而楚北而春明晝為人治事夜則篝燈讀寒暑罔間兩應京兆試一應本省鄉試不售道光二十九年援例以從九品需次楚南大府檄辦湘陰災振全活甚衆三十年從湖廣總督裕泰公赴武岡州剿辦新甯亂民李沅發事平獎叙免補



本班以府經歷縣丞補用蓋公初入仕即以兵事顯也是年粵  
匪起檄赴永州防堵旋以母憂歸咸豐二年粵匪犯長沙巡撫  
駱文忠公奏留公辦理軍務長沙圍解叙功擢知縣三年以剿  
桂東土匪勞績免補府經歷縣丞本班至是粵匪張甚由武昌  
連陷九江安慶金陵進逼江西南昌於是湘鄉曾文正公以待  
郎家居率湘中子弟勤王起義檄公乞餉於嶺南是年冬從曾  
公駐衡州創水陸兩軍四年以克復湘潭功晉同知秩 賞戴  
藍翎會我軍一失利於岳州再失利於靖港公佐曾公蒐討軍  
實掇拾補綴以復成師是年之秋東克武昌漢陽田家鎮冬以  
水師乘勝攻九江大舸蔽江岸別以舢板小艇持半日糧下湖

口奪賊梅夾洲浮橋入鄱陽湖既至姑塘而賊復合踞橋以斷  
我後逮夜我大軍燬於火曾公慮水師陷湖內不得出無統帥  
且饑潰使公單騎間走南康領之公移舟趨吳城傾家資並勸  
戚鄰輸錢米餉軍、以無恐是役也我師大衄微公事幾殆十  
二月遂以水師下都昌復就食於南昌待曾公進止五年正月  
曾公自九江至追論田鎮功擢同知仍率水師防堵瑞豐三月  
丁父憂既歸葬曾公奏留公治羅忠節公一軍餽餉往援楚北  
是冬以克復咸甯蒲圻崇陽通城四縣功湖北巡撫胡文忠公  
奏請 賞換花翎六年江西各府皆陷曾公因內湖江楚道梗  
公先統水師至是湖文忠公以新募之陸軍曰彪營者俾公與

劉騰鴻普承堯合師援江沿途再克咸蒲崇通入江境兩復新  
昌上高進規瑞州曾公奏擢知府旋由新昌取道羅坊攻奉新  
出賊不意營獅山梯城而登賊死守不能卒拔乃先下安義靖  
安而後萃於奉新明年克之公嘗以是役殺傷太過為恨時軍  
需告匱饟不時至公就地勸富人輸將且以其羸解濟省垣安  
輯譁潰事訖力為請獎其有汙賊偽職反正者為固請弗問人  
以是無怨而重德公曾公知公可大用遂以道員記名請 旨  
簡放既與諸軍合圍瑞州軍中拜廣東南韶連道之 命仍留  
剿賊、乘夜而突圍佗軍不支聽其竄越莫適任咎公願獨承  
之巡撫耆齡公奏褫花翎城下之日復請賞還冬我東鄉師潰

省城戒嚴公孤軍扼康山賊不能越而湖北巡撫合詞劾公濫  
招游勇奉 旨革職交江西巡撫查辦公散所部無一卒譁者  
耆公為昭雪免議九年耆公奏以公督辦撫建甯三屬團練立  
團防營既成軍即出境援徽公自是遂入皖矣十年春克建德  
督辦皖南軍務左副都御史張文毅公奏開復原官花翎時韋  
志俊新降以其衆驟至洵、懷反側公資遣之赴東流大營綏  
以威惠得無變而徽郡復告急奔命往援公於徽防為客軍惟  
主者檄所向公弟修攻以叅將偕道員蕭翰慶援浙與公會休  
甯別去死湖州之難公乞假歸秋徽防兵潰勢岌、公方在假  
公弟今江蘇候補道修欽攝軍事由嶺外鄆村奉檄返江西行

伍肅然時曾公已督兩江軍祁門嘉之益信公治軍有紀律也  
使守湖口而賊圍建昌益急巡撫毓科公檄公救之甫抵撫州  
賊由金谿竄東鄉移師迎擊於鄧家埠大破之賊復自貴溪竄  
安仁我軍隔河不能渡賊復竄德興萬年之交將擾景德鎮公  
由饒州馳赴景德以固祁門大營之後獨往謁曾公直我建德  
師潰賊將上犯曾公予公三日期馳保湖口公戰賊而行先賊  
至城得完毓公奏加鹽運使銜以獎其勞明年曾公檄守無為  
旋移廬江自此公遂長駐皖矣同治元年曾公使公乘輪船如  
上海勘江陰沙還以公筦營務處仍統團防營駐蕪湖與金陵  
甯國兩大軍相首尾號令嚴整江介肅清賊伺聞來犯輒擊追

之曾公不次奏獎格於吏部新章奉 旨仍以道員記名簡放

二年 召公及修葺赴山東防剿曾公以江南事尚棘奏止之

公雖未行亦可知 朝廷倚公之重矣夏我軍克金保圩秋復

高滄溧水及溧陽東壩諸隘公皆有功三年春 賞加布政使

銜嗣以克復金陵功 記名以按察使遇缺題奏四年署徽甯

池太廣道補按察使五年署布政使至是公始親吏事初公治

軍以嚴稱及治民則噢咻煦嫗有如傷之仁安徽巡撫英翰公

駐師潁州時 出境剿賊公在省治轉輸餉糈未嘗遲之起學

校葺公廨率作興事百廢具舉不使英公有內顧憂英公由是

稔公才七年英公丁父憂還京謂公清介剛勇堪膺大任請以

臬司攝巡撫事奏入，報可未幾補授布政使逾年，上命英公回皖撫任公回藩司任公以前遭父母喪未及在籍終制乞歸補制百日假滿入覲又逾年而受事至則澄汰吏弊規復舊章捐置學宮禮樂器選諸生肄之陶淑有具民氣大和郊市之間熙、攘、忘其為兵燹後皆公之力也公身長鵠立論事鬚髯奮張人多憚之而其慈祥惻隱則發於至誠初從曾公使獄某弁犯微臯曾公怒欲誅之公力諍而免估客十餘人遇盜喪資斧邏卒得之居為獲謀功公悉縱遣去凡公殺賊不可勝計所將卒有犯法者皆勿貸而平心活人乃多類此公在軍最久前後以功得官屢晉秩然公異軍特起所統綦少又或迴斡於敗挫之後賞不得行或顛蹶於艱勩之時黜非其罪故雖以末僚起家游陟屏藩兼權疆寄而人心猶覺歎然以公為未竟其用也轉戰歷數省服官則於皖故皖人尤思公生平篤於道義師事曾文正公垂二十年文正薨哭諸寢哀甚氣鬱成腦疽疽雖獲瘡而氣血大傷疾發終不起公以嘉慶二十一年閏六月初七日生同治十一年九月二十四日卒於官享年五十有七巡撫英翰公奏請照軍營立功後積勞病故例議卹上俞所請贈內閣學士銜廕一子入監讀書期滿以知縣用公元配張夫人繼配彭夫人皆以公署巡撫時恭遇 覃恩贈封至一品子明鐸先公卒公以彭夫人及篁室劉氏洪氏數生女復嗣

猶子明鈺明田為已後孫則藩候選郎中軍功 賞戴花翎曾  
孫孝先孝民女某、皆字名族公不侮鰥寡不畏彊禦獨立天  
壤以成功名敦尚氣節所居之室輒榜曰結歲寒緣館嗚呼可  
以見公之志已江西之忠義祠吾皖之忠義節烈祠曾文正公  
專祠皆捐俸獨成之輕財好施不殖生產饌客至豐腆而常餐  
不過薑豉惟酷嗜書籍藏弄至數萬卷殫之日家無餘財善草  
書撫孫過庭書譜得其神髓好吟咏夫口而成動合於古著三  
恥齋詩十卷校刊半畝園叢書三十種濬頤為公部民初不相  
識猶憶同治戊辰之秋量移兩淮度嶺而北十二月抵皖江謁  
公、欣然握手曰吾聞鄉人勒少仲觀譽數稱君故久知君名

今幸得解后誠天假之緣也即留飲勿使去抵掌慷慨談天下  
事所以期許之者備至互有贈答留度歲除夕復治具招飲  
瀕行送諸郭門依、不忍別迨己巳又有嶺南之役孟冬始返  
廣陵適公朝天北上復相見於何氏壺園自是箋奏往還傾吐  
肝膈不同恆泛方冀公指日真除建牙開府長為吾皖蒼生之  
福而孰意從此永訣耶吁可慟也公歸道山已三稔哲弟伯莊  
觀譽以事來揚州持武進管才叔所撰狀濬頤曰茲以某月某  
日卜葬先兄於某原乞予為埋幽之文濬頤不敢辭也敬作銘  
曰  
槃、大材善治軍旅蹶而復起驅除狼虎公本書生乃握韜鈴

受知文忠文正繼焉勇捍粉榆功在桑梓左右相俟欲行且止  
甫偃戎旃載持使節咨汝旬宣遑勞陳臬獨秀爰兀大龍嵯峨  
從容坐鎮舍公則那直諒果毅表裏如一嚮用方殷云胡顛踣  
弟子從師控鶴廣桑萬民尸祝千秋勿忘嗟予撫膺輒呼負  
公之姻家我之死友卓然可傳一代偉人後有作者視此貞珉

孫母吳太夫人墓誌銘并序

同治十有三年孟春萊山學士視學閩中任滿奉母吳太夫人  
還京師道吳中適太夫人病乞假一月延醫調治少瘥於三月  
抵廣陵予與梧江廉訪為甲辰同年交最篤萊山固梧江之從  
弟其猶子駕航觀譽之女又為予孫婦萊山知予之第五女待  
聘因為其仲子請婚於予作三日留予欲登舟拜母而太夫人  
以病謝遂迂道返涉上未幾見邸抄萊山因病陳請開缺則適  
然驚既又陰念必太夫人病革也仲冬赴至今年二月萊山復  
遣下走寄眎告殯文云毓汶於正月某日卜葬某阡乞為志墓  
予讀萊山之文真摯沈痛一字一淚心既服其純孝而太夫人

之媿德懿行顧安可湮沒弗傳於後耶爰不辭謏陋而為述之  
太夫人姓吳氏本吳人幼即患寒濕嬰腹疾治之全瘳年十六  
歸孫文定公為筮室時正室韋太夫人已下世太夫人逮事寄  
浦相國淑慎靜婉能博堂上歡文定公於道光丁酉服闋入都  
供職悉以家事委之太夫人處事精詳克勤克儉內外周庀物  
無棄材至於贍卹戚鄰扶持孤弱太夫人曲體文定公寬厚待  
人之意殫心竭慮而為之人歌公德而實則皆太夫人總理劬  
勩之力也文定公之再出也年逾五十患歐血證遇勞輒犯太  
夫人夙興夜寐於飲食起居調護維謹數十年如一日以故文  
定公屢持使節游陟農卿得以盡瘁廟廊無內顧憂迨七旬以

後養疴京邸杖履優游徵太夫人烏能及此耶治家之餘性尤  
好學讀全史三過旁及卜筮星相之書靡不研究曉天文辨躔  
次博通淹貫有大家風萊山駕航叔妣年相若太夫人為之經  
營婚娶迄於成立先後並登科第太夫人之訓萊山者萊山舉  
以告予曰讀書偶情則訶之性情褊急則規之少年豪放口不  
擇言太夫人曰毋妄發也昧於時宜方圓柄鑿太夫人曰宜知  
節也蓋以慈母而兼嚴父義方之教媿美湛韓俾萊山登著作  
之庭樹山斗之望披沙剖璞迭掌文衡豈偶然哉顧太夫人夙  
有癥瘕之疾旋治旋發家事煩冗病根未除重以海壖卑濕所  
患加劇迨歸里後纏綿不已竟於十月十八日棄養享年五十

有八以子毓汶貴 誥封恭人 晉封夫人孫三槿槃榕萊山  
書云奉安寔安在先公先妣之側吾母氏九京靈爽庶有憑依  
也銘曰

嗟我四齡即失所恃嫡母撫之有如已子祿弗逮養抱恨終天  
因循至今始克表阡君書忽來使我腸斷鮮民之生中心寤  
我不如君遠奉板輿三山侍養足報勞勛我不如君躬親含殮  
母兮全福佳城歸窆學士家聲上紹歐陽焚黃告奠無異瀧岡  
九、松柏薦蘿則施敬告幽宮徽音永企

王母盧孺人墓誌銘并序

嗚呼在室為孝女既嫁為令妻為順婦而又為賢母遭顛危處  
窮約不改其常而碩德懿行足傳於世者如王母盧孺人洵可  
風已孺人姓盧氏浙江黃巖人祖孝廉塤父處士肅烜幼而穎  
慧女紅之外喜讀書通五經大義旁及文史兼工吟詠年十四  
母卒哀毀絕粒其父固喻之乃強食亡何父亦病醫久不瘳泣  
禱於天請以身代剗左臂和藥以進病果瘥及笄適王維齡事  
翁姑一如其事父母也夫之諸弟夫之妹幼穉媿教之讀若嚴  
師然以婚以嫁勿勞厥兄勤治內事饗殮井臼率以身先之迨  
諸猶子出就外傅每日歸必令背誦所讀書熟則使就寢暇日



與夫子伉儷以詩風雅倡隨致足樂也咸豐十一年粵寇犯浙  
東是時維齡之父及仲叔兩弟皆已下世維齡與季挈全家避  
難邑之五部轉徙蒹坑其地在萬山之中昆季輒重趼踰嶺迨  
迨數十里負米還家孺人先潔膳奉姑以次及長幼已則獨啖  
薯蕷和麥屑充腹而已越明年四月寇退得歸而孺人病矣家  
故貧亂後益困力佐維齡持門戶焦勞不得息竟以同治四年  
卒年四十有六孺人生子五禹堂同治庚午舉人元祜國子監  
生士鏞士驥士鏡孫四所作詩散佚禹堂輯存一卷曰焦尾閣  
遺稿以某年某月日葬某銘曰  
傳者誰南滙張誌者誰定遠方德若此胡不壽內行完女宗首

死無憾兒成名竇氏桂儕其榮夫何諛亮哉質表芳型視此碣

陳母張太孺人墓誌銘并序

子勤孝廉為予門人劉鏞山太常丁卯江南鄉試所取士予延之課孫燕昭已三載循、善誘俾小子得膺拔萃之選知其夙秉母教端品勵學為潤州人士所推重近則僑居海安設帳課生徒以供菽水自來廣陵歲時必拏舟歸省前年為其母太孺人稱七十觴予每故問起居子勤則敬對曰堂上神明不衰蚤作晏眠無一日安子婦所弗及也今年春太孺人病予止子勤勿來亡何赴至子勤既成喪持狀丐予為文以志其墓按狀太孺人姓張氏諱友書字靜宜丹徒人祖榜四川丹稜縣知縣父壬邑諸生母殷氏父早卒兄崇蘭字悔廬以舌耕奉母太孺人

時尚幼即能以女紅佐饗殮顧性穎慧好讀書過目即了工  
詩鍼黹之暇不廢吟詠適同里選拔貢生陳宗起字敬庭故名  
儒內行尤篤事母柳太孺人以孝聞太孺人既于歸相夫子克  
盡婦職柳太孺人衰病喜怒不恒則曲意將順之雖勞勿怨生  
長男克劬即子勤柳太孺人愛孫甚聞其啼輒怒時方炎暑太  
孺人患瘍兒亦患瘍首不能就枕眠恒自忍痛終夜抱兒膝行  
帳中搖撼之俾兒眠熟恐啼則觸姑怒也其孝而且慈類如是  
柳太孺人下世敬庭先生遂絕意進取一以著述為事嘗謂太  
孺人曰自恨生平學殖荒落未能顯親揚名今欲壹志於學冀  
有所造就家事悉以累君可乎太孺人素善持家自是益黽勉  
鉅細必躬親之中饋而外刀尺之聲夜常達旦戚鄰稱其賢敬  
庭先生下帷攻苦致成疾太孺人生次子克常才數日竭力侍  
湯藥昕宵罔間或勸以新產宜少節勞太孺人正色曰夫天也  
天方難測敢自愛乎逾數月知不起號泣籲天願以身代泣盡  
繼之以血已而竟不起哀毀絕粒痛不欲生既乃顧二子一女  
歎曰吾之從夫於地下分也其如此呱者何吾已許夫子於  
生前敢食言乎蓋敬庭先生易簀時知太孺人有死志故以子  
女相屬也是時太孺人年甫三十克劬才七歲克常生甫兩月  
女才四歲家故寒素嫁時衣又盡充藥餌之費不得不取給於  
十指間飽其子女已則忍飢未嘗向鄉里貸一斗粟也悔廬與

敬庭平素以道義相期許閱其妹之無家也招之往太孺人亦以兩子不可廢學遂携子女往依兄殷太孺人春秋高嫂氏吳病不能理家政悔廬謂太孺人曰妹之二子教養在我、之家事願妹任之以分母氏憂太孺人既為兄持門戶兼撫子女辛勤備至居母家十五年中間遭嫂氏之喪為經營喪葬又為兄續娶林氏並嫁其二女絕不煩老母過問克劬舉茂才欲迎歸奉養又以殷太孺人年益高不忍離邾下越二年殷太孺人棄養終喪乃歸謂二子曰吾為汝輩讀書計竭力以報舅氏今舅氏之事既畢而吾家之事方始矣乃葺屋宇脩器皿為克劬娶婦柳氏又嫁女於高氏屏當未就猝遭粵寇之亂倉皇出走太

孺人淒然墮淚曰家本無長物今者拮据麤了室家之事欲以報吾夫於地下也乃顧若此豈天不欲成吾志耶因渡江北行間闕至泰州東鄙之海安鎮遂家焉克劬早有文譽故負笈從游者甚眾甘旨賴以不缺太孺人既經喪亂彌復省嗇旋為克常娶婦馮氏逾年生孫而克常又以療卒克常才氣過人太孺人尤鍾愛之於其卒也悲不可支幸克劬舉於鄉意少慰然以夙嬰憂患之身重遭流離挫折雖眠食無恙而心力則交瘁矣克劬勸其勿計米鹽瑣屑則怫然曰吾食貧茹苦數十年以至於今幸得溫飽汝輩遂欲吾作廢人耶且吾習勞已慣固安之毋多言生平明於大義教子不事姑息見一善則喜曰汝父嘗

為此曷勉旃見一不善則怒曰汝父曷嘗有此速改之母貽汝  
父羞以故二子皆無違行太孺人苦節得 旌於 朝著工餘  
吟草越吟草海鷗吟草詩詞各三卷卒之前一夕猶諄以勤  
儉二字為家人戒嗚呼若太孺人者殆終其身於憂患者歟嘉  
慶八年十一月初八日生光緒元年三月十三日卒春秋七十  
有三將以某月某日合葬於敬庭先生之塋銘曰

魯敬姜耶宋歐母耶上追古人傳萬口耶我交令子淑德是欽  
冰霜之操松柏之心有坊表衢有祠歌祀厥後必昌遺徽彤史  
哉三山滔大江呼匠伐石幽宮永藏

誥授通奉大夫前廣西柳州府孫君墓誌銘并序

嗚呼濬頤於道光甲辰通籍我侶梅同年時官秋曹勤治獄不  
獲數相見偶為文字之飲則脫畧形迹洞開城府連舉數十觥  
了無醉態而氣度雍容性情醇厚予固心折焉以為今之古人  
也嗣粵西粵東分馳官轍十餘年之久音問濶絕迨至同治癸  
酉之夏侶梅挈舟過邗上則已弃官為諸侯座上賓為講舍弟  
子之師長身修髯興復豪邁與予話別後情狀觴之儀董軒抵  
掌雄談盡歡而散次日甫起則門者持詩筒至矣予亟走筆答  
之而和章又到爭奇鬥險屢戰不休予曩第知侶梅雄於文又  
烏其雄於詩若是歟不奕而喜者奕輒於待月謬作壁上觀奕

罷即命酒白留三月餘唱訓之作得數十首計甲辰到今三十年矣三十年中惟此會為最樂因約來歲渡江更圖解后乃去年書來以病不果行又有鼓盆之戚今年夏初突聞凶耗喪我心交傷何如也重陽後其嗣子國榮以狀抵予乞為誌墓予奚能辭按狀君姓孫氏諱壽祺字錫祉號子福又號侶梅晚號西溪梅叟先世自常熟徙居大倉州遂家焉曾祖世興妣氏黃祖震妣氏周氏曹父鳳岡妣氏李三代皆以君貴封贈如其官君昆弟六人齒居長嘉慶十七年十一月十一日生君甫弱冠即為諸弟授經口講手畫孜孜不倦以故列膠庠登賢書者後先相繼皆君之力也幼穎異八齡即奮志讀書每至夜分舉家酣

寢猶呬唔不輟漏三下乃已十二歲學詩古文辭十三歲學制舉藝尤好吟詠與同里友人聯社並以道義相切勵學益進庚寅舉茂才試輒高等天性孝友以家貧設帳授徒藉脩脯為菽水資養志承歡無微不至癸卯甲辰聯捷成進士官刑部主事君讀律如讀書朝夕研究手定爰書雖老於刑名者咸歎弗及長官倚重之上問尚書某公刑部司員誰能實心辦事某公以君對當時贈君詩者有西曹第一人之譽蓋紀實也顧君趨公奮勉寒暑罔間披覽案牘竟夕不寐心力交瘁致患怔忡之證且以思親念切癸丑乞假南歸抵家病少瘥乙卯主講師山尋就今福州將軍星崖公之聘佐幕揚州丁巳以團防籌餉功

奏獎免補主事以知府用復隨星崖將軍至揚州戊午以克復  
瓜洲功奉 旨以知府遇缺即選君赴部謁選到京甫六日聞  
訃贈公棄養星奔以歸哀毀骨立喪葬盡禮洎庚申粵寇入吳  
復隨史懷甫觀察辦理軍事駐宜興之五洞橋時大江南北盜  
賊叢起郡邑紛紛淪陷軍書旁午寢饋弗安常州為賊所困復  
奉張璧田軍門檄至無錫堵剿君以一書生馳驅戎馬屢冒鋒  
鏑擊賊有功繼隨江小雲觀察辦理糧臺文案兼製造捐輸報  
銷諸局駐高郵辛酉至鎮江賊薄城下攻城甚急君晝夜登陴  
規畫戰守與觀察同作浩氣歌以見志從容鎮靜激厲將士絕  
兵出戰卒解城圍癸亥入都部選廣西柳州府知府乞假歸里  
奉母李太淑人之官並體親心令適王女弟之孀居者挈子女  
及諸猶子全行君素好遊是役也詩滿行篋舟至洞庭天大雷  
雨驚波駭浪從者變色君方酣卧醒而告家人曰自問忠信可  
憑何畏蛟龍之厄坦然就枕無何而風頓息既抵桂林大府稔  
其才欲留獄獄而同僚亦以柳州地瘠民貧戒勿往君則以奉  
天子命不敢避艱苦矧兵燹之餘瘡痍未復固二千石之責  
也曷敢舍難就易乎大府彌賞之議於藩庫每年津貼千二百  
金以為公費君下車之始簿書繁冗一一釐剔之實事求是興  
利除弊禁絕苞苴胥吏官給口糧不許用民間一錢出入一蓋  
一輿屏去駟從所屬八州縣與之明定章程曰懲誣告曰清積

案曰慎詳銷曰訪訟棍令下而舞弄刀筆武斷鄉曲者率聞風  
遠颺府治燬於兵燹則多方那移稱貸勾工庀材費不足則典  
衣以繼閱二年落成繪圖作記嵌石於壁隙地治圃名曰拙園  
為公餘歌詠之所署清勤於堂以自勵并修文廟 萬壽宮羅  
池廟劉賢良祠皆捐廉以為之倡直歲大旱步行至距城十餘  
里之龍潭祈雨炎暑赤日面目盡黑經兩旬得雨乃止饑年米  
價騰貴為采買轉運以資接濟又籌建義倉儲穀半貸商而薄  
其息以供平糶復繕完城垣兵房更築礮臺以備防守百廢具  
舉且易衣微行訪問民間疾苦柳江向為文物之邦自罹烽火  
久輟絃誦君督所屬牧令振興學校書院則延名流主講厚其

膏火郡試日坐堂皇殫心校閱多士爭自濯磨文風日盛或令  
諸生導引城廂內外訪古墓碑有頽廢者悉皆修葺人以柳  
州稱之乙亥奉檄赴省父老羅拜道左祝太守重來不數月君  
果回任故有孫公再來天有眼之謠古所謂名父杜母君殆其  
匹耶治柳三載尤以表揚風化為先凡孝子節婦皆請旌於  
朝馭吏雖嚴而量材器使寬其責備亦無曠職牧令來謁必誠  
之曰州縣為民父母當思無媿此四字所以無媿不過使各得  
其所爾不延幕賓文書尺牘皆手自屬稿蒼頭祇一二人必擇  
謹愿者公費外佗無所取官廨食指浩繁炊烟時斷君處之晏  
如也或曰君為貧而仕今因仕更貧奈何曰非不愛錢欲勉為



清白吏耳會以強項忤上官某遂遇事齟齬有訟案涉於請託君力爭之因假佗事誣劾大府惑之補行大計以才力不及去官士民往請於大府大府曰此非吾意曰疏由公上奚云非公意柳之人實受太守福闔郡口碑具在公甯弗聞之大府不能荅於是衆謀建生祠立德政碑君力卻之曰典郡三年毫無建樹內疚於心七千里外幸得奉母還鄉吾願足矣惟以衙署未歲工書院課藝刊未竟旬留一月瀕行餽饁一無所受街衢里街黏詩盈壁馬平胡次封孝廉有句云公到柳州公獨窮公去柳州民無宗柳真累公、愛柳公不棄柳、負公是日祖餞者不絕於道而君則黎明已徒步出郭門矣官紳軍民挈舟相送

數十里有至水口登岸百里之遙不忍言別者君固辭馬平崇令君獨攀轅痛哭餘皆流涕太息而去行李蕭然惟盆蘭卷石圖書數卷而已石上自盟曰磊、明、清、白、一、權、柳、江、載、茲、片、石、謂、諸、子、曰、異、日、還、鄉、當、繪、介、石、貞、蘭、圖、也、歸、舟、以、詩、紀、程、丁、卯、到、籍、旋、奉、母、命、橐、筆、從、戎、隨、合、肥、相、國、逐、賊、於、齊、魯、燕、趙、鄭、衛、之、間、戊、辰、以、擒、匪、肅、清、奏、獎、奉、旨、開、復、降、調、處、分、仍、以、知、府、遇、缺、即、選、嗣、主、講、宿、遷、書、院、己、巳、復、就、星、崖、將、軍、之、聘、入、閩、庚、午、以、前、辦、江、南、糧、臺、勞、勩、晉、三、品、秩、又、以、剿、擒、匪、獲、優、叙、三、代、皆、得、二、品、封、典、洵、異、數、也、辛、未、遭、母、喪、盡、哀、盡、禮、如、贈、公、時、壬、申、主、講、師、山、瀛、洲、兩、書、院、兼、修、海、門、廳、志、崇、明、縣、志、君

一知軒草  
原配宗淑人繼配即淑人女弟亦封淑人子四人長寶善蚤卒  
原配出次即國榮君仲弟壽康子出嗣為君後次寶璣原配出  
次寶麟繼配出皆殤女子八孫一家相甲戌繼配宗淑人卒君  
先在崇明感暑濕舊疾復作至是疾更劇以光緒元年三月初  
七日卒年六十有四國榮書曰府君當析產分爨時以已與三  
叔父皆服官在外各以所分之田為膳田供先大母甘旨先大  
母見背則歸諸公田迨歸田諸叔父讓屋以居府君則仍居兒  
時讀書處才四楹曰吾所慣也事伯祖芝軒公如事先大父待  
手足以誠白首怡怡至今周問慷慨好施予急人之難所求無  
不應南北往還到家輒先展墓博觀羣籍尤服膺近思錄厭聞

二氏之說遺命禁用浮屠氏自奉儉約敝衣十年不易每飯不  
過二簋遇事勇敢而持之以沈默堅定而出之和平故愈倉卒  
愈形暇豫教子弟曰耐貧讀書安分守己毋好近名毋貪小利  
毋昏於怨已而明於責人嗚呼國榮能不忘庭訓縷述若此予  
既喜其克家而重為我侶梅同年痛也至謂生平所欽佩者以  
予儕之宋雪帆劉融齋兩同年予何人斯謬蒙延譽心滋慙已  
君著述宏富自訂詩古文辭若干卷藏於家生平所好經史而  
外尤嗜金石丹青過眼即辨真贋云宗淑人有婦德能博堂上  
歡戊戌產後得疾不起彌留時屬君勿戚曰我三妹賢淑可事  
夫子即呱者亦無母而有母矣後二年繼配宗淑人來歸女

弟之賢若其姊撫子女如已出翁姑固嘗言之以哭兒得肝證  
君從戎淑人憚遠行勸君納妾粵寇之難淑人奉姑居孟城招  
叔如同居君典郡治官書或終夜不寢必秉燭危坐以待可謂  
賢矣將於某年某月某日合葬於某銘曰

君才槃々乃屢方面君遇厄々乃老鉛槧三月之聚以謂可再  
不分永訣使我心痲高安方伯溧陽侍郎大理繼之推肝斷腸  
自癸至乙及君而四落々乾坤更誰把臂問君之年長予三齡

君胡先歸厭棄風塵君歸天上名滿天下濡毫磨碣屬後死者

贈光祿大夫張公墓誌銘 并序

公諱蔭穀字藍畦先世居江西自明時有諱鰲者始遷廬州府  
合肥縣至公之曾祖從周卜居於西鄉周公山下殷家畝山介  
大潛紫蓬兩山之間綿亘截嶽人遂稱為周公山張氏祖世科  
太學生父傑皆有名德公生而好學性嚴重不與羣兒嬉從其  
鄉人湯先生某讀書旦夕刻勵未及三月髮落幾盡道先己丑  
補博士弟子員三應秋試輒被黜於有司時公之祖父母父母  
均在堂食指浩繁生計日蹙公乃罷制舉業晝侍重闈以謀菽  
水夜則取諸子日間所讀書為之剖晰意旨教以作文之法至  
漏三下猶媿々不倦癸巳公原配孫夫人卒越三年公之祖世

科公卒又五年公之父傑公卒又四年公之母李太夫人卒又一年公繼配魯夫人卒又一年公之仲子婦吳氏卒又一年公之繼祖母章太夫人卒十七年中斬哀之喪三期之喪四而公之六子樹培又蚤夭其間延醫侍疾必躬必親遭罹鞠凶哀毀盡禮祭奠殯葬纖悉周至重以男婚女嫁者<sup>五</sup>措拄經營心力交瘁鄉里皆服公之善於持家也迨丙午壽州盜起掠公鄉公則聚鄉人部以兵法擊走之逆料東南將有兵患乃率諸子廣招豪傑材武之士相與周旋曉以忠孝大義人莫測其所為已而粵賊陷金陵蔓延江淮近踞廬州擒匪又乘間而起公初聞警即出資振貧戶倡辦團練為官軍聲援簡其精銳者命伯仲二

子帥之從剿無巢英霍太潛諸邑所至克捷然官軍諸將帥往往擁兵自衛委鄉軍嘗賊無所接應以故不能竟其功公知禍猶未已不得不為自全之計詔鄉人築堡於周公山殷家畝從而歸者萬餘家而前直隸提督劉銘傳雲南布政使潘鼎新甘肅涼州鎮總兵周盛波廣西右江鎮總兵周盛傳江蘇徐州鎮總兵董鳳高皆奉公條約相率築堡以耕以戰連摧粵賊陳玉成擒賊張落刑兩巨股數萬之衆斬馘無算七八年間公家雖破公鄉獨完威望義聲赫然為一郡之冠於是賊相戒勿犯三山蓋左則大潛為劉氏所居右則紫蓬為周氏所居也時鳳台苗沛霖假團練為名樹黨自固大帥倚之洊擢監司淮北千餘

里聞風相應公心知其非戒鄉人毋與往來而沛霖卒以叛誅  
惜乎公不及見之矣當其躬際時艱捍衛桑梓解紛排難轉危  
為安於是三山之衆應募而出分為樹銘鼎盛四軍隸合肥相  
國部下規復三吳埽盪粵賊擒匪由東南而及西北大勦克奏  
爵賞酬庸而淮軍足與湘軍相抗實賴公為之倡云性尤孝友  
公父足患疔日以口吮之竟瘥族人戚鄰之孤寡有廢疾者必  
賙卹之貧不克葬者為卜地以葬咸豐六年歲大旱人相食公  
無儻石儲每屏當得升斗粟輒分半以給鄉里廬郡再陷於賊  
難民來投公堡者必使得所無流離之苦與人交必誠必信遇  
不平事則義形於色家非素封居恒節儉愛惜物力然當大難

則揮金如土不少吝嗔焉公以嘉慶癸亥九月初三日生卒於  
咸豐庚申九月十三日享年五十有八卒之日弔者不遠百里  
而來咸欵獻泣下曰公嘗活我也以伯子樹聲貴三代皆贈先  
祿大夫妣皆一品夫人公之三繼配為李夫人公子九人樹聲  
廩膳生今官江蘇巡撫樹珊 記名提督廣西右江鎮總兵死  
德安之難贈太子少保諡勇烈爾蓋鹽運使銜山東補用道樹  
崇五品銜候選中書樹屏 記名提督樹玉四品銜候選員外  
郎樹培其二殤孫十人某、孫夫人初葬於周公山北新十六  
衛莊之原公匱於某年某月某日啟封合祔同治甲戌中丞公  
丁李太夫人憂奉喪歸合肥營窀穸畢僑居寶應以事至揚州

持贈公狀屬濬頭補作墓誌迺為銘曰

公之殫亂在一鄉屹然壁壘倂金湯殤後二年軍甫成叶厥初  
起義民勿忘公之教子罕與倫文通武達社稷臣中丞述哀得  
其真碩德懿行追古人十有五年匪遼緩肥水肥山白雲斷孝  
思翬、躬則蹇春露秋霜雙淚泣昔也荷戈今列戟佳城我、  
郭西宅蕃衍熾昌被遺澤傳之千秋視此石

提督銜

記名總兵葉君雲巖墓誌銘

往在京師得交一內行敦篤樂善好施之君子曰葉雲巖予與  
君初不相識以永定門外馬回甸義叻地隘欲擴充之人有以  
君告者因過訪君、時為江南提塘官見善必為孳、不倦名  
動輦下公卿交游徧海內與予把臂欣然商以購地之事君遂  
廣為勸募佐予集資若干適予有嶺南之役交某君經理其事  
而君亦從軍於外久不通問迨同治己巳予量移兩淮過金陵  
乃復見君、奉曾文正公檄移建江甯府學於朝天宮命君董  
其事時將落成與君一晤而別癸酉之冬君調署奇兵營游擊  
駐儀徵予竟弗獲相見而甲戌之冬則遽聞君殤予服君之宅

心譚粹勇而兼仁天必大有以報之願乃未竟其施為可悲也  
越明年其鄉人某持君之狀來乞銘於予、弗敢辭按狀君姓  
葉氏諱圻號雲巖浙江秀水人曾祖青菜祖宗泰父濤三代贈  
如君官君以嘉慶十二年十二月初一日生幼而穎敏讀書深  
明大義六韜三畧貫弗於胷中挽強命中材力過人年十九即  
舉於鄉五上公車輒報罷道光乙未充江南提塘癸卯差滿以  
營守備用叙勞勩加都司銜時直東南軍事起胡文忠公知君  
之才調赴軍營差遣旋又隨曾文正公進剿江西肅清全省於  
皖解青陽城圍於浙攻復湖州奮不顧身所在戰功卓著君尤  
長於製造在皖則火藥等五局在江甯則工程局軍械所遇事

講求俾成利器以佐戎行火藥鉛丸發無不中大帥咸倚重之  
由都司洊擢至記名總兵加提督銜並賞給一品封典同  
治八年權提右營叅將事統帶師船兼陸路巡防時有裁汰兵  
五百名皆老羸及陣亡所遺幼弱覓食無所者君為之惻然與  
當道各捐廉俸並撥公帑集成鉅款取息於質庫月給口糧以  
資其生兼為清節堂籌卹瘞費寒冬則散給貧民衣禪如是者  
五稔滬上民戴其德去滬之日白叟黃童遮道焚香環送於百  
里之外云儀徵居水陸之衝福德洲新浚鹽河移棧於此萬艘  
雲集五方雜處羣不逞之徒時虞竊發固以保甲為重君至則  
偕同有司周歷巡察商旅又安乃於十三年十月二十日卒於

官享年六十有八君卒之日閭閻嗟悼弔者塞途君配楊夫人  
子女鏞兩淮候補鹽大使君性至孝少時失怙哀痛如成人戚  
鄰咸異之迎養母氏陸太夫人於京邸母素多病君朝夕扶持  
抑搔衣不解帶夜不安枕病瘥乃已三十年如一日孺慕之忱  
至老弗衰以母病祈福施藥餌凡京師之悅生堂恤廢所皆賴  
君贊襄其事實惠及人君雖洗、武夫而怕、儼儒者喜交游  
重然諾友朋緩急所求無弗應者鄉里之人故於京師貧不能  
飲君仗助之且歸其喪蓋無歲無之願自甘澹泊躬矢儉勤身  
後囊橐蕭然不名一錢嗚呼品詣為獨絕已將以某年某月某  
日葬於某原銘曰

君之德我所欽君之喪我未臨歎然有媿於心我則知君之深  
異夫諛墓者之失其真君誠今之古人白頭揮淚手勒珉



唐忠壯公墓誌銘并序

公姓唐氏諱殿魁字蓋臣合肥人曾祖璧祖大經父夙儉世有  
隱德公以道光十二年二月二十八日生賦性剛直好任俠年  
少時即有請纓之志咸豐三年粵寇陷金陵皖北盜賊乘間而  
起鳳臺苗沛霖假團練名擁衆數十萬橫行劫掠所至為墟官  
不能制公隨同劉軍門銘傳集鄉人申明大義以兵法部勒子  
弟賊來輒擊走之有司因倚之以辦團練南禦粵寇北捍苗匪  
十年赴援六安力解其圍拔補千總十一年攻克合肥之三河  
汛同治元年始應募隸銘字營劉軍門統之規復江蘇駐軍滬  
上五月迭攻南匯川沙金山衛奉賢柘林等廳縣躬冒矢石戰

功尤多大帥入告擢守備 賞藍翎是年六月令直隸總督合  
肥相國時為江蘇巡撫命公回皖添募銘字右營九月成軍連  
下南匯川沙金山衛奉賢柘林青浦各城並擊退虹橋大股之  
賊 朝廷獎其勞擢都司 賞換花翎二年正月賊圍攻常熟  
昭文層層築壘並分踞楊舍福山各汛江陰無錫金匱三城公  
會同諸營航海下福山以解常昭之圍進薄楊舍賊列陣相抗  
以逸待勞公身先士卒大軍繼之鋒不可當賊盡卻公乘勝窮  
追城上飛礮如雨敵中鉛丸深入肌理亟剷去之畏創復戰遂  
拔之旋復會攻江陰無錫金匱次第克復疊授渠魁 賜振勇  
巴圖魯名號擢游擊又血戰下江陰擢叅將 晉副將銜 記

名總兵是年十一月劉軍門圍攻常州踞奔牛鎮賊首邵之倫  
乞降許之東南北三面合圍唯西通丹陽一路地險賊衆咽喉  
之地賊所必爭邵之倫雖以地獻必得我軍助守其心始固乃  
令公與副將黃桂蘭各率所部往公甫至而常州丹陽之賊果  
分道來犯公戰退之自顧兵單瀕河而營賊初不察虛實及夕  
偵之止二營乃率衆環攻公告桂蘭曰奔牛為常州門戶我軍  
舍此而去之倫必不能守則常州一軍危矣計唯有死守待援  
桂蘭以為然相與揮淚誓師衆皆感奮賊屢攻屢敗死者數百  
人度陸攻不下勾結甯波奸民偽為夷人狀駕礮舟轟擊岸上  
賊乘勢進薄礮震營壘屋宇顛覆所部五百人傷亡過半相持

二十餘日糧盡勢幾殆而劉軍門攻常州亦中礮傷額聞奔牛  
警畏創赴援苦戰數日公氣益振夜則遣死士潛運糗糧軍火  
詰旦飽食嚴裝與援師夾擊大破之追逐十餘里殲賊首偽官  
天將朝將並悍卒無算是役也公以一旅之師拒水陸賊十餘  
萬忍饑寒甲志不少挫卒能會合援師保全要隘常州迎刃而  
下一戰之力也晉提督銜又以攻克常州手殲巨憝以提督記  
名簡放三年四月遂統銘字右軍六營四年四月隨劉軍門渡  
淮為游擊之師日行百數十里公必前驅不以為苦且戒其麾  
下將弁曰我輩布衣受國恩身膺將領一營之費月糜帑三  
千若稍耽安逸不思殺賊報國何以為人効命疆場吾儕分內

事死且不懼敢云勞耶聞者咸為心動公平時撫循士卒若子  
弟然號令嚴肅有犯必懲所到之地體卹民艱不令妄取一草  
一木民尤感之五年正月攻克湖北黃陂補浙江衢州鎮總兵  
旋奉 上諭記名提督唐殿魁著遇有提督缺出儘先簡放並  
賞給正一品封典遷廣西右江鎮總兵仍留營督師剿賊自是  
風沙雨雪無日不奔馳於鄂豫間迨六年正月十五日抵湖北  
天門之尹隆河賊反戈相向公鏖戰良久賊狂奔急躡之賊又  
列陣以待部將總兵田履安陷陣死公憤甚策馬直前手刃數  
十賊、懼而竄公不甯少休欲盡殲賊揮兵再進而河崖高丈  
餘所乘馬中飛礮墜河力竭遇害年甫三十有六事 聞議卹

贈太子少保銜 予謚忠壯國史立傳江蘇湖北及安徽本  
籍均建立專祠 賞騎都尉兼一雲騎尉世職公兄弟五人齒  
居四配宋夫人子治堯今福建陸路提督俊侯軍門為公之弟  
與予交莫逆持公之狀來告曰吾兄殉於王事忽已九年矣  
將以某年某月某日葬某乞吾子為文以彰其節傳示子孫感  
且不朽予弗獲辭為之銘曰  
以少勝多以守為戰如公之勇足當一面功在三吳名達 九  
重盡瘁而已不尸其功兵貴神速有進無退忠哉壯哉甘蹈危  
地公之靈爽助季平番險逾鹿耳威揚虎門戕佳城以寔以  
寔傳之千秋視此貞石

通議大夫按察使銜甯紹台道史公墓誌銘并序

公姓史氏諱致諤字士良一字子愚號耜梁為漢滎陽侯崇公  
五十六世裔孫世居滎陽之湖埭里宋末徙夏莊公之五世祖  
隨進士江西瑞州府知府有循吏稱高祖貽儉為文靖公之兄  
舉人湖北安陸府知府曾祖勝妣氏管以兄范之子汝櫛為嗣  
是為公之祖妣氏蕭又以兄汝楫之子錫祺為嗣是為公之考  
妣氏楊三代以公貴 覃恩累贈通奉大夫妣皆贈夫人其本  
生兩代皆得 貤贈如例先是公本生祖靜香公以就姻遷居  
常州公考蕉鄰公早歲失恃事繼妣謝太夫人以孝聞補弟子  
員贅於楊氏生子三伯致諒叔致穎公次居仲以嘉慶七年十

一月十六日生幼敏悟靜香公鍾愛之雖育於外家常携之室  
中令侍飲食靜香公棄養蕉鄰公由青州奔喪歸哀毀咯血公  
方八齡旦夕侍抑搔有若成人比長慷慨尚義善處繁劇事戚  
族尊行以疑難相託者紛如亂絲立剖之年十四五即有幹材  
同里憚紉之張雨棠兩先生負文學盛名公從之遊得所師法  
蕉鄰公屢試不第久客袁浦體羸多病公年十八左右扶持頓  
忘其苦道光四年寄籍宛平舉茂才是年蔣淑人來歸公恒館  
於京師十四年舉順天鄉試十六年成進士改翰林院庶吉士  
故事庶常於秋間大課公課畢方欲歸省而蕉鄰公訃至一慟  
幾絕星奔返里經營喪葬盡禮盡哀先是蔣淑人卒於家遺子

恩綬甫九齡公服闋復娶於蔣即淑人之同胞女弟二十年散  
館授編修歷充國史館協修幫辦院事兼本衙門撰文方畧  
館纂修國史館纂修二十五年充庶常館提調奏辦院事公  
在館久為掌院所倚重又從事清秘堂六七年無一日曠誤遇  
有鉅製盛典及館中奏疏掌院一以相畀淹雅明達克稱厥職  
二十六年充順天鄉試同考官得士十三人迎養楊太夫人於  
京邸二十七年京察一等二十八年覆帶引見記名以道  
府用旋擢江西廣信府知府宣廟召對天語褒嘉以為詞  
臣罕有其匹廣信控豫章上游為閩越孔道號稱難治而漕務  
更多弊公下車之始政尚嚴明百廢具舉治獄詳慎多所平反

捕貴溪漕棍劉開發等十人寘之法頌聲翕然二十九年部議  
開廣信之廣豐及袁州之宜春兩縣礦公以乾隆九年廣豐開  
採僅得銀三萬兩而捕剿礦匪則糜費二十餘萬得不償失徒  
以擾民檄屬吏至廣豐試所產似銀非銀名曰垢石白諸上官  
其事遂罷直東南大水廣信山鄉尤患衝決則講求水利修堤  
放閘督率所屬次第行之故鄰郡告灾而所治獨豐稔勸捐助  
振立集巨款賚至省垣而外郡饑民來者日衆賙卹流亡全活  
無算清查州縣賦額庫帑有無虧絀綜覈旬稽條分縷析下僚  
罔敢欺隱而調劑盈虛亦無有以此獲咎者試院年久傾圮捐  
廉俸修葺之校場向濱河為山水所齧移之白茅洲並建闕帝

廟南門外長清浮橋朽腐博采衆議改用渡船聯之為舳移於  
鍾靈橋故址又於通衢造五甕石橋行人便之公餘課士於信  
江書院論文講藝士風丕變成豐元年權南昌首郡大府知公  
才壹意委任公不阿不亢凡有關於民生利病者反覆力爭必  
得請而後已是年冬回廣信任二年粵寇犯長沙江楚連界民  
情震動公復權首郡總司團練並辦保甲親歷巡邏風雨晦冥  
不少休於德勝門外築三礮臺修補城垣二千五百餘丈改建  
章江門濬濠城內豫章溝設懸門布渠答一切守禦軍械甫備  
而九江戒嚴南昌城門晝閉謠言四起公請於大府洞開七門  
而派員嚴稽出入不使奸宄溷跡人心始定厥後粵寇由金陵

回竄九江陷南康掠吳城圍攻省垣九十餘日江忠烈公督師  
赴援實賴公先事豫防部署周密用能嬰城固守轉危為安十  
月公仍回本任三年寇陷饒州延及撫州廣信界撫饒以貴溪  
為要隘公招募健卒名信新軍馳至鷹潭相度形勢因險設伏  
與浙軍相犄角賊知有備不敢前所屬七邑胥安而撫饒之東  
南境亦恃為屏蔽當是時省垣被圍久內外隔絕惟貴溪之東  
有間道可達進賢公復遣員弁輦城守所需者以資省垣俾無  
缺乏初浙省協解餉十萬以道梗折回廣信公白諸浙撫請  
截留以備江右緩急至是浙餉亦絀公會七邑紳董曉以輔車  
之勢民間輸納以償浙逋十日而集八月復權首郡四年得荷

真除之命賊氛甫退百務至集公則協和將吏激厲軍民上  
下一心艱難共濟江右諸郡行淮鹽者過半惟廣信鄰浙行浙  
鹽軍興淮鹽不至公創議借辦浙引以餘息充餉名曰餉鹽大  
府疏入報可即命公襄其事年餘銷引逾於常額江楚及浙  
皆利之省垣半燬於賊樓櫓睥睨多不完公請修復增月城四  
礮臺六汰新募之章武軍併入舊部信新軍以節糜費倡捐水  
龍會置救火兵百二十名居民至今賴之方省垣之解圍也賊  
由九江上犯楚之通城興國仍與南昌屬之武甯義甯相逼賊  
自興國攻義甯未下遂陷武甯武甯在萬山中實為南昌肘腋  
之害公自率信新軍偕浙軍游擊常海馳往剿賊迭挫之於紫

鹿嶺於中口於火爐坪於箬田甫一月下之會下游有警折回  
省垣是冬吳城我師失利楚軍亦敗歟於九江之官牌夾南昌  
大駭援師四集與江右諸軍不相下主客判然重以餉乏外患  
未已內釁復可憂督師曾文正公與公為齊年友素稔公引以  
為重故楚軍亦皆敬公諸軍或有忿爭公至立解則有勇丁二  
持刀索質庫錢勢洶公見而立斬之一軍皆驚大帥弗以為  
忤五年兼攝鹽法道文正檄辦楚軍子彈火藥礮位三局事並  
籌餉糈亡何饒廣相繼陷義甯亦陷公憤甚請率偏師為大軍  
前驅大府不許公益殫心竭力以助諸軍之出而逆酋石達開  
由楚入江疊陷六郡公益鎮靜練軍繕守賊終不敢窺南昌而

去六年丁楊太夫人憂公聞訃哀毀奔喪於杭州文正擬請奪  
情公力持不可既行巡撫文俊公仍奏請留江襄辦軍務而西  
安將軍福興公駐軍廣信復奏調隨營七年奉 旨交福興軍  
營差遣委用將軍以乏餉欲就廣信勸捐公念弋陽貴溪楚軍  
所在因地為糧民力已竭上饒玉山廣豐興安鉛山五邑雖殷  
富以寇警遠避均無可捐唯鉛山之河口鎮商賈輻輳親往勸  
諭兩月得銀十餘萬既濟福軍更以其半充藩庫嗣巡撫耆齡  
公以改辦浙鹽具有成效偕侍郎黃公贊湯檄公辦理西岸鹽  
務仍筦三局八年福將軍復檄赴江浙乞餉公上書當道請以  
河口一軍兼程繞道會浙師以解廣豐之圍復謂廣信為浙江



外救衢州為廣信後勁必緩急相濟賊庶不得逞迨全浙淪陷  
衢州幸存今陝甘總督湘陰相國奉命視師乃藉此為進兵  
地人始知公所議得兵機之要也公既至浙福將軍旋解兵柄  
公念外除十載父母殯宮猶未合祔遂歸常州卜地於南門外  
龍游河將諏吉舉山林大事而當道飛檄召公還不得已留其  
弟營寔宥俶裝就道九年服闋到省公前任南昌所屬失守例  
有處分以功過相抵免議又以大計保薦卓異勞績賞加道  
銜嗣復免補知府本班以道員用並不論雙單月儘先選用十  
年入都引見奏對稱旨奉 上諭發往浙江交王有齡差  
遣委用又命幫辦浙江團練蘇常不失南北道阻改由豫楚

行十年抵常山浙撫王忠愍公檄赴江右催餉因而折回鮑軍  
門超方廓清江右公上當道書以浙事日亟請出偏師下擊嚴  
州以徽軍為策應閩中簡勁旅會衢防直搗蘭谿以廣信防兵  
為策應則賊勢中斷圖反救杭越之圍可解惜不果行寇陷全  
浙二年浙撫湘陰相國檄辦滬上商捐奏署甯紹台道時則曾  
文正公兼轄浙江軍務江蘇巡撫合肥相國節制甯紹兵事兩  
相國皆重公聽便宜行事甯紹台自上年陷後天台民團首先  
恢復而甯波亦資洋兵之力下各城方謀畫曹江而守尋以法  
國總兵馬籌思與游擊布興有季先所部廣勇互鬥廣勇潰賊  
乘間回竄慈谿奉化將撲郡城公聞之立請東渡甫受篆即報

慈谿失守距郡才四十餘里烽火相望兵單餉匱公激厲居民  
登陴助守整飭稅釐以通餉源公之附輪船來甯也與美國兵  
官華爾同舟見其忠勇奮發遂介以見英國總兵哇樂德克法  
國稅務司日意格推誠相語均感服約束洋兵頓釋前隙公以  
賊犯慈谿覩我有內難今出不意攻之城可復乃令布興有率  
礮船先迎堵於大西壩檄華爾攻慈谿撥稅務司姚防洋兵及  
同知謝采璋團勇應之慈谿賊分竄鄞界另股擾及半浦而嵎  
縣新昌之賊復大舉犯陳公嶺我軍旋克慈谿華爾中銃卒而  
陳公嶺不守奉化復陷知縣屈永清死之南北渡防務又警公  
念三面皆賊必以剿為防爰乞餉於滬令都司楊應龍募忠勇

軍紳士李鐸招集大嵐山義勇及各鄉練勇又以廣勇潰散慮  
為賊用招之回令布興有布良帶守備張其先分統之部署方  
畢而賊由北渡問道越櫟社直犯郡城天正而陰霾蔽空人心  
惶惑公勒兵以待伺其懈輒出擊之賊陰有退志則分兵兜剿  
連敗之橫溪石橋進薄奉化楊應龍率死士百人由城西北布  
竹梯以登奪其北門賊驚潰下之奉 旨補授甯紹台道奉化  
敗賊復勾結上虞賊分道犯慈谿餘姚公以賊衆我寡分援力  
弱不如併力搗上虞則賊且急而還救願出師漸遠不能兼顧  
郡城且籌餉維艱日不暇給乃以兵事屬之前署道張公景渠  
而張公已奉 旨逮問公一再籲大府奏留以堅其銳往之志

用能士飽馬騰中外協力所向有功復上虞下嵎縣新昌我軍至是已增萬餘人乘屢勝之勢謀規紹興賊首偽來王戴王擁衆七萬與我師夾曹江而軍我師奮勇渡江敗賊於東關又敗之於夏家埠直抵紹興會洋將勒伯勒東達爾地福輕進礮炸而卒諸軍稍卻蕭山諸暨之賊來援我軍再戰悉擒斬之二年再薄紹興分攻三門賊跋前疐後遂不得專力以拒金華而浙東之事易為矣大軍既克金華諸暨賊酋方蒂桂降於我軍遂復紹興進克蕭山與大軍會於錢江浙東以平公力籌未發之餉撤遣之費十餘萬而大軍之圍杭者復需月解兵米二萬石其佗餉項亦多取給於茲竭力圖維事無不濟洋將陰狡者利馭

之、術則在自強我先鎮撫其軍自為戰守使彼無所挾反足收效彼以火器猛烈弗知持重公則陰遣一軍左右維繫之攻紹之役雖洋將不利而全局無損職此之故公於外國駐甯各酋皆待以誠信日意格尤敬公用是交涉事件咸得其要領會同英領事捕斬與英人私設護商局之鎮海土匪吳浩泉甬江為通海口岸內地梗阻懋遷者皆登海船舶甯郡初復內洋盜匪剽掠為患公乃添雇輪船礮艇往來巡緝先後擊沉盜艘七十餘更立安瀾局以綏靖之於是商旅無恐百貨騰至闕征日有起色浙中吏治尚文飾初設釐捐漫無條貫公遴選局員務取廉潔者設白月報嚴核之各州縣失事人員有能隨營効力者

每捷必為陳於上官曰此某之功八邑底定保全無算事平周  
歷所屬察被難輕重為善後計振卹瘡痍無微不至湘陰相國  
整飭吏治凡錢糧平餘及官府陋規俱議禁革公履任之初即  
杜絕苞苴至是躬率各屬實力奉行其有不便者皆於參牙時  
面陳其弊江南奏減蘇松太漕賦部議酌減三分之一并減常  
鎮十分之一杭嘉湖與蘇松錯壤賦額亦同奉 諭一律核辦  
公上書湘陰相國及文正公合肥相國指陳漕弊數千百言畧  
謂蠲賦惠政減正額尤宜革浮收於 國家儲胥無損於小民  
更為獲益唯各州縣情形互異辦法不同當擇大者奏咨立案  
餘並着為省例以盡通變之宜大府避之三年湖州既復賊由

江西竄福建提督高勇烈公率兵會剿公檣舟濟之為籌欠餉  
行糧軍火為數至巨湘陰相國以籌餉勞勩入告 賞加按察

使銜並賞戴花翎臨海匪徒全得利以捕急竄南田南田故海

島禁山土地饒沃金得利糾邛才清等據之築壘自固公白巡

撫馬端敏公往剿平之毀石壘或議設兵屯田公上五難六弊

之說議遂寢五年例造金州頭十兩號戰船故事牙戶領帖承

辦勒索山民而官不過問公則捐廉給工價別令親信監造牙

戶不得售其奸先是甲子春公以衰老乞休大府賴公籌餉不

允所請嗣奉 中旨察看湘陰相國調任陝甘總督瀕行疏稱

公辦理諸務均無貽誤而年力就衰奉 旨以原品休致公乃

得賦遂初公在甯時即先營建宗祠蘇常克復遣人返溧陽修墓族姓貧者飲之宗親故舊自離亂以來依公者甚多歸田之後倍加撫卹無使失所常州溧陽初設善後局公捐巨款為之倡舉邦人之廉幹者司其事武陽兩邑分縣不分學遇選拔僅貢一人公偕紳耆白諸當道聞於朝武陽添設貢額自同治癸酉科始公起家寒素習知民間疾苦又博覽史冊明於歷代治亂得失嘗謂橫雲山人明史稿近而有徵憲廟硃批諭旨尤昭代科律居恒研究故在官有所施設切中事情久而無弊軍興以來蒿目時艱一以培養元氣為主前後籌餉累數百萬皆體味文正病商病農之語熟察而行若有所甚不得已者

江右告警凡異言異服者即以奸民論公省釋無辜至一千六百餘人附郭民屢癸卯賊至先檄焚之賊去子遺之氓茅茨以居辛酉訛言有警當事又欲焚之公時為寓公走謁大府乞少緩以待民遠避後賊竟不至所全者數千家察吏之材者畀以事推心置腹或不獲於上遭譴訶公身任之浙省失事諸員相戒勿用喻以棄婦委非公則曰使功不如使過也性機警乙丑署黃巖鎮總兵剛安泰公巡洋被戕報至將度歲急檄武弁追盜於爵溪洋聚殲之師旋已元旦矣與人一面即識其爵里名字久而不忘翰詹考試故事由清秘堂散卷供事唱名公在清秘以館閣前輩清班峻望而唱名於供事非宜因躬自散卷字

而不名百餘人無一誤者濬頤固親見之公論為政之要須從  
根本做起方能腳踏實地顛撲不破與宋雪颿侍郎為道義交  
函札往還無虛月嘗致書侍郎謂五十年中不作欺人語不為  
負心事而侍郎亦謂公學問經濟具此兩言誠定論也官江右  
時迎養楊太夫人承歡備至軍事一不以聞顧念蕉鄰公未逮  
祿養時復飲泣尤篤友于之愛少時與伯兄奔走四方以謀甘  
旨及官翰林伯兄倦游家居京秩清貧必并食易衣節俸金以  
為接濟伯兄歿諸子幼稚公教養昏宦俾各成立季弟幼從公  
讀所至必偕猶子三撫育教誨皆有聲庠序歸族父之喪於江  
右養族之孀母無依者其他善事不可枚舉公兒清癯雙眸炯

然終日正襟危坐不喜作行草書所服御至數十年雖菽猶整  
潔晚歲里居率家人日出而作織屑必親沆爽無城府遇事款  
悃始終如一不欲以矯激為高而砥礪廉隅義弗苟取倭文端  
公為公書慎節齋額跋之曰慎言語其立誠之學乎節飲食其  
無欲之學乎公之生平蓋得力於是云教二子讀書以治經為  
急勉之為真讀書人又曰能讀書尤貴能識時務當今之世保  
家立業第一義在通經達禮有器識有擔當窮其本原不外乎  
人情物理上認真體驗隨時隨處勿輕放過則心思愈用愈靈  
事理愈省愈透澈嗚呼處世之道盡之矣好獎掖後進一技之  
長稱不絕口脫過非禮直言規勸受人之惠報德不厭所施於

人事過輒忘故遠近聞公之喪而哭失聲者不知凡幾也公以  
同治十一年三月二十三日卒享年七十有一公元配蔣氏贈  
淑人先卒繼配蔣氏 誥封淑人子二長恩縵元配出福建題  
補廈門同知署雲霄同知次恩緒繼配出舉人內閣中書孫四  
定官盤官奎官聯官孫女二先緒丙子恩緒計偕北上道揚州  
持公狀乞為埋幽之文將以某年某月某日葬某濬頭曩官京  
師為詞館後進久從公遊知公最深不敢以不文辭迺為之銘  
曰  
我與公文因宋侍郎辱公愛我垂老弗忘銜恤遠遊道出信江  
既分清俸俾得成行嶺南北歸又荷公貺淹滯章門形神悽愴

公曰勿爾為之屏當過返故鄉甫營喪葬悠々一別倏逾二紀  
感公高誼古之君子及公歸來我官邗水毘陵匪遙近在尺咫  
過公之里末由見公城闌夜鑰有刺難通公喪未哭悒々於胸  
讀公之狀聲歎如逢侍郎曰公一時無兩壬癸之間治兵籌饗  
不尸其名功任人攘可謂知言盛德同仰吁公有子述公勲烈  
能讀父書使我心折我文非諛質而且實傳之千秋不可磨滅

二知軒文鈔

定遠方濬頤子箴

太子少保東河總督喬公墓誌銘并序

濬頤曩在京師因李子皆太守得交於公時公官工部政最簡  
春秋佳日輒就子皆與予為文字飲坦夷和易脫畧形骸並識  
濬泉溥泉兩丈而止弟子健來應京兆試亦獲交於公及公典  
郡擢監司游躋開府三十年中望尊位顯獨於春明故舊念  
弗忘遠道馳書歲時不絕手自作牋情詞肫懇子健殉丹陽之  
難荷公疏聞於朝俾邀賜卹尤感大德迨濬頤量移兩淮  
適公養痾海陵挈舟過訪驩然道故自是通問更密公再出山



相去太遠尺一往還仍如疇曩乃先緒初元遽聞噩耗中懷悲悼不能自己公之扶危定傾布澤行惠大江南北萬口同聲稱道勿衰公與濬頤同庚表揚勲烈傳示來茲固後死者之責也謹詮次公一生事蹟為文以埋諸幽公姓喬氏諱松年字健侯號鶴儕山西徐溝人曾祖玠妣氏趙祖人傑湖北按察使有捕盜救荒治河諸大政書傳於世乾隆五十八年英國入貢道天津廉訪公時為觀察宣布 朝廷威德饋遺悉卻之英人敬公馴服盡禮而去嘉慶中英人猶有慕名求見者而廉訪公則已歸道山矣祖妣氏朱父邦憲刑科給事中妣氏馬本生父邦哲為給諫公之弟直隸遵化州知州政績載入志乘本生妣氏蘇

繼妣氏李三代及本生皆以公貴贈榮祿大夫振威將軍妣皆一品夫人公以嘉慶二十年六月十九日生幼穎悟資秉過人道先甲午乙未聯捷成進士年甫十九以主事籤分工部補鉛子庫主事陞都水司員外歷充提調監督咸稱厥職咸豐元年典試湖南得人為盛遷屯田司郎中截取知府揀發江蘇先權常州未幾調署蘇州時粵寇張甚吳中防堵之潮勇潛通上海賊酋劉麗川圖不軌公偵知之白上官誅其為首者而人心以定會上海七營兵潰沿途劫掠金閭戒嚴城晝閉公減騶從由水關出撫循其衆安堵如故尋補松江府知府兼攝蘇松太道佐巡撫吉爾杭阿公治軍出奇制勝克復上海改署常鎮通海

道旋即真除丁父憂吉公方駐軍九華山規復鎮江奏請奪情  
檄辦營務公之初至常州也倡捐廉俸召募義勇按戶抽丁設  
保衛總局嚴詰奸宄屢有所獲如守蘇時迨九華為賊所陷吉  
公以身殉潰兵之患甚於上海金壇丹陽悉為蹂躪常之西北  
鄉已有賊蹤十室九空其勢岌岌公則亟白當道撥餉十萬赴  
新豐鎮招逃亡歸伍散給口糧堅請總督怡良公移師丹陽以  
固門戶又於村墟到處巡邏果有土匪受賊指者立擒為首之  
姜方槐等十八人寘之法餘勿問是年復大旱則請免米船抽  
釐與商販護票諄勸富者輸將凡振濟六次全活甚衆鎮江既  
復公仍兼理營務處請設官銀局行鈔票法民皆稱便書院課

士躬自校閱優者獎之金陵久為賊踞士之北上應京兆試者  
公欣以資斧午酉兩科登賢書者不少實公之賜嗣兼權兩淮  
鹽運使行假道法淮鹽由東壩運銷輸課尋丁降服憂大府倚  
公再請奪情由是朝廷知公才擢公運使當是時兩淮引地  
不通商販四散司庫如洗公移駐泰州設法招徠商販每年得  
課數十萬以濟餉糈擢江甯布政使筦江北糧臺轉輸不匱威  
愛兼施消薛成良之患於未萌揚之人汔今猶能道之先是庚  
申江南軍營大潰南臺闐然長江水師枵腹而譁幾欲北犯公  
與各將領約片帆勿渡暫由北臺協濟並令沿江民團聯絡聲  
勢以助水師江北因之無恐公在蘇常七年襄贊戎機先事豫

防用能轉危為安不失寸土迨移節廣陵總師干者左右無人  
遂至一敗而不可收拾矣常州既陷居民避難紛々渡江土人  
方指為賊利其輜重戕其性命公聞而哀之於泰靖各港口設  
巡船防竄賊渡難民并於泰州設收養難民局病者施藥歿者  
施棺行者予貲居者予食事平之日資送回籍故常之人僉曰  
公父我母我也同治二年陞安徽巡撫苗逆初平捻匪尚橫任  
柱張總愚等竄突楚豫倚蒙毫為老巢每直各路兜圍輒圖回  
拒公由臨淮進扼壽州外櫻巨寇內靖土匪三年冬粵寇藍大  
順合任張捻衆十餘萬回窺霍山公檄諸軍隨僧忠王大兵蹙  
之於英霍之交斬大順降其渠魁解散黨羽幾十萬江南之賊

不復與北捻通而捻鋒亦始大挫乃逆黨姚紹采徐廣山輩陽  
為投誠陰謀乘變公不動聲色捕而殲旃又以雉河集為捻之  
老巢議於其地建渦陽縣並建龍山營於宿之龍山集下蔡為  
苗逆老巢議移鳳臺縣治於其地又以皖北幅幘遼濶廬鳳穎  
道治不及議分設安廬道於省垣奏入皆報可六安霍邳之  
王稀毛猴王庭用為著名巨憝楚軍屢剽未獲我師傷亡實多  
公又畫擒斬之於是商賈漸集釐稅日充軍餉以裕公既除道  
梗復慮田荒乃買耕牛市穀種分給鄉農俾資生聚其流民來  
歸者資遣之與駐泰州日無異四年淮水漲溢壽州城不沒者  
三板百姓露處高阜磬々待斃公廣備糗糧汎舟以振十餘萬

衆得慶再生軍書旁午文教不興必修復書院以逆產充公為  
久遠計又與治常州日無異皖省稅則本輕願以規費日增上  
下所需咸取給於此故浮收之數有數倍於正額者且有私收  
折價至十數倍者公重加釐定奏明通省暫征折色除部定解  
部定價外酌留羨餘以濟公用而上下衙門一切陋規盡數刪  
除民受其福公亦不至重累十餘年官民相安從無一征漕滋  
事之案蓋瘡痍未復公之所以培養之者深也五年調撫陝西  
出壽州士民送者相屬於道時任柱賴汶洗兩股已被創自豫  
而東獨總愚擁悍黨乘間西趨賊氛橫亘於華渭河陝之間公  
輕車由蒲渡河取道同朝知陝軍素疲定策入境後即率師渡

渭營渭南以守為戰師未至賊已越渭南長驅而入公甫抵同  
州亟由間道入省嚴備以待無何陝軍潰於灞橋賊直薄省垣  
隴回為捻所邀亦踵至城中無一可恃之兵人情洶々公激厲  
疲卒登陴固守招集散亡以圖復振奏調劉松山郭寶昌兩軍  
入秦連敗賊於咸陽岐山富平朝邑捻不得休息與回再合一  
年之中捻未能挾回以窺河東繫公之力又以西同鳳所轄地  
勢平行力申堅壁清野之議令大小鄉均築堡以守厥後相陰  
相國統師廓清隴右公實有預為之謀者體本羸弱頻年籌兵  
籌餉心力交瘁七年春移疾得請僑居泰州閉門著述繼配劉  
夫人工書畫雅有倡隨之樂八年劉夫人下世公孑然一身惟

思報國九年北上復拜倉場總督之命十年遷東河總督公  
統籌全局周歷履勘議築隄束水順黃北趨入海為一勞永逸  
計惜不果行盛夏嚴寒宣防河次因復積勞成疾十三年十二  
月聞 穆宗毅皇帝升遐呼號欲絕光緒初元正月奉頒 遺  
詔勉率僚屬哭臨成禮釋服之期嗚咽不勝禮畢昏眩不起掖  
之入內遂卧床絕粒以二月十四日薨享年六十有一嗚呼公  
殆歸作 先皇侍從之臣耶遺疏上 聞 九重震悼贈太子  
少保銜公無嗣繼本生胞弟廷樾子聯寶為後廷樾官江西鹽  
法道聯寶甫九齡應得二品廕生 恩賞主事公天性儉約不  
喜西人諸器公餘手不釋卷其已刊者為葦蘿亭札記未梓者

緯廩數十卷泉詩古文辭藏於家接見僚屬雖炎暑必衣冠危  
坐不揮箠何東洲太史贈句云裘帶溫文羊叔子衣冠樸野衛  
文公蓋紀實也在軍治軍書一目數十行夜分始寢暇與賓僚  
討論往事講求利弊孳孳不倦其御將佐則解衣推食如家人  
父子而處變決疑當機立斷雷霆迅發莫可端倪待親故於贈  
遺不少怙而不可干以私恢宏好結納而不周旋當路清風亮  
節卓然可傳於世公薨之後皖紳請於臨淮壽州各建專祠大  
府入告 從之昨又聞常州紳士請入祀名宦祠公之遺愛在  
民信而有徵非予一人之私言也某年某月某日葬某銘曰  
我初交公兮公則了不異人公之出而典郡兮乃遭際夫遭迤

既福三吳兮又福吾皖建牙樹纛兮經綸大展公為名臣兮公  
為通儒公不驕人兮中抑、而外愉、公所造就兮皆美材狀  
公生平兮簡而該何以報公兮日報公以文字濡禿管兮揮老  
淚迨、佳城阻南北兮我思執紼嗟未得兮如公有幾人三朝  
宣力兮千秋不朽俾貞珉之是勒兮

通政使司通政使朱公墓誌銘并序

光緒初元朱太史琛典試廣東歸道揚州持其尊甫景唐通政  
之狀乞予為文志墓予與通政為齊年友曩在京師同館同臺  
相聚十餘稔朝夕過從形跡罔間及予轉外臺而公則由侍御  
內擢數年之中掌銀臺權憲部駁、將大用願以乞假募親歸  
里一病不起既忠且孝在公固可無憾而太史復能玉堂接武  
為國掄才競、焉思表揚先人之德嗚呼予與公春明一別遂  
成永訣今幸公有子焚黃告祭足慰九京予亦奚敢以不文辭  
按狀公諱夢元字貞起號錦堂又號景唐先世系出發源緯公  
即紫陽文公之伯曾祖宋建炎間始遷涇縣高祖萃廩貢生六

合縣教諭曾祖安謙妣氏胡祖平泮妣氏洪考一屮妣氏洪世  
有隱德三代以公貴皆贈資政大夫妣皆贈夫人公以嘉慶壬  
申四月十一日生幼岐嶷穎敏過人讀書目數行下少長習帖  
括下筆即工兼擅詞章之學時贈公服賈章門久以族人有占  
籍貴溪者命公往應試補弟子員旋食餼道光丁酉科選拔貢  
生益下帷攻苦肄業豫章書院試輒冠其曹癸卯甲辰聯捷成  
進士改庶吉士尋丁母憂星奔回里越明年又丁父憂迭遭大  
故痛不欲生丙午奉兩櫬歸厝於涇服除入都補行散館以部  
屬用籤分刑部充上諭館行走癸丑記名軍機章京甲寅  
補江西司主事秋審處行走勤於讀律援引必當治獄多所平

反嘗曰桁楊之下必有寃囚能得其情固不專恃威懼也乙卯  
擢福建司員外郎會荊州將軍綿洵公奏調赴湖北軍營襄理  
文案時方炎暑橐筆從戎勤勞備至未幾將軍去官公仍回京  
供職丁巳記名御史戊午補軍機章京兼方略館協修直軍  
書旁午昕夕不遑撰擬悉當上意遷山西司郎中己未補浙  
江道監察御史歷充繙繹鄉試武殿試武鄉試考試恩監試  
官公自居言路益思補衮冬亢旱戶部及儲濟倉火而秋曹重  
案株連未決疏請修人事以迓和甘條列入告得旨先行庚  
申轉掌雲南道監察御史稽察北新倉復奉命巡視西城人  
避驄馬莫敢干以私辛酉充武會試監試官是冬補行京察列

一等同治初元壬戌引 見奉 旨記名以道府用尋充覆試  
各省舉人監試官查勘貢院工程監察大挑舉人稽察本裕倉  
磨勘鄉試試卷擢鴻臚寺少卿先是公配葉夫人有婦德事舅  
姑克盡孝養公應禮部試時姑有疾夫人躬自調劑藥餌衣不  
解帶者五十餘日治家嚴肅勤而且儉公故無內顧憂隨官都  
門嘗衣一敝裘補綴鱗次見者不知為命婦也公未第時贈公  
年逾六旬抱孫念切夫人體舅心為公納簋室玉孺人生子三  
琛琪琇琛同治庚午辛未聯捷進士官翰林院編修女一孺人  
婉順能得堂上歡佐夫人持門戶舉動必循禮法而夫人亦視  
子女如已出門內雍睦無間言乃於是冬先後下世公傷悼彌

甚以父代母口不言劬戚鄰謂公趨朝待漏不可以無內助有  
作詩寓勸者公答之曰不願為兒添後母且將家政一身肩太  
史為予述之猶淚涔下也公自壬戌十二月擢通政司參議  
癸亥二月又擢太常寺少卿十月轉大理寺少卿迨甲子四月  
擢太常寺卿五月復擢通政使司通政使曾未三稔頭銜五晉  
公念 兩朝知遇之恩益感激奮勉以圖報稱又奉 命稽察  
右翼宗學揀選貴州府縣等官典試山左得人為盛試畢回京  
即拜署理刑部右侍郎之 命公以往者久列網曹趨堂畫諾  
令一旦秉丹筆位諸司上處事詳慎愈不敢自逸 朝廷知公  
明允真除當在指顧間而公則以故鄉寇擾寔寔未安弗忍貪



二知車草  
戀榮祿因於丙寅春乞假修墓聞命即行兵燹之後沴氣積而不散遠歸者觸之輒病公抵里後見田園荒落故舊凋零展拜先塋益增悽愴遂染疫纏綿捐館舍是為九月十九日享年五十有五公天性孝友律已至嚴待人則和而介有以非義干者正色卻之歷官清要忠誠亮節時流露於奏草中立言務持大體為國家培養元氣穆宗御極之初即疏請豁免各直省歷年積欠錢糧得旨俞允下部議行佗如賞卹衛兵清理庶獄請飭江西撫臣查辦巡難士庶奏加旌卹江西省城建立張文毅公專祠兼請予謚皆為政體之大者不妄叅劾亦不輕薦舉苟其人貽誤大局則糾彈不避苟其人克膺重寄則推薦必

先至於杜漸防微內而宮禁外而疆場敷陳密勿留中不發者公輒焚其草外人固無由知之也嘗夢贈公訓之曰持以靜默鎮以從容公醒而肅然銘諸座右自奉甚約食不兼味衣敝弗棄少時客漢皋為人書誌銘受其酬或勸其置珍裘公曰吾將持歸奉甘旨違以自炫耶者書不喜游覽公餘則手一編詞賦雍容華貴為儕輩所推服撰擬進奉文字泉唱和贈答詩篇不自收檢每為友人携去好揚人善後進有片長必獎之孤寒之士則加意培植之俾其成就而後已太史所狀若此嗚呼公方正之度肫摯之懷予習見之且心欽之誠如太史言是可傳也以某年某月日葬涇之某原銘曰

翰、塞、未竟厥施貽之後人俾守鈇規初見長公決其必遇  
果然言中足傲姑布故里弗忘張香都從親地下身甯孤佳城  
我：蔭三株畢生行誼殊卓絕永播清芬延世澤謂予不信視  
此碣

戶部左侍郎宋公墓誌銘并序

濬頭曩官京師十餘年尚意氣好結納交游徧海內而性情相  
洽終始弗渝古道熱腸可師可法者則莫如雪帆侍郎侍郎長  
濬頭十歲當甲辰釋褐時諸同年咸尊之為兄而杜筠巢侍郎  
又偕乃兄繼園侍郎與同年十人締金石交侍郎居首予亦得  
廁其間自是聯轡看花圍爐煮酒文字之會殆無虛日侍郎與  
此九人者視如手足傾吐肝膈畧形骸真摯坦率儕輩萬弗  
能及之迨己酉濬頭銜恤歸里迭遭大故重以寇擾家中落淹  
滯不出者六稔再到春明重荷侍郎與通緩急予悒、不自得  
頽勉之規之以遠大相期倖獲外轉嶺南距京師七千里則時

時函尺一道殷勤不以山川為阻及量移兩淮通問尤密碌  
毫無建樹屢欲作歸計以書相商輒正言止之而於時事艱難  
政令得失則必舉以相告忠君愛國之忱與濟困扶危之念蓋  
無日不往來於胸中當代如侍郎者有幾人哉嗚呼已矣侍郎  
今歸天上誰復知予者予為侍郎痛更自傷也先緒甲子秋其  
孤陳壽扶櫬道揚州予往哭之陳壽持狀乞予為文志其墓嗚  
呼予烏能已於言哉按狀公姓宋氏諱晉字錫蕃號雪帆溧陽  
人唐時卜居於此自其八世祖檄明諸生從祀鄉賢九世祖臣  
熙歲貢生廣東新安知縣從祀名宦十世以下皆登科第官於  
朝高祖陽森妣氏某曾祖煊妣氏談祖維城妣氏張考緒候選

州同知妣氏史繼妣氏史四世皆以公貴贈先祿大夫妣皆贈  
一品夫人公考贈先祿公六齡喪父家故貧妣張太夫人撫二  
子兩女饜飧不繼督長女晝夜力女紅以十指佐贈公就外傳  
讀疊遇奇荒家益不支贈公乃出依其戚彭氏於長沙隨往湖  
廣總督幕府習法家言以嘉慶壬戌十二月二十六日生公兄  
弟四人公齒居長六歲入塾讀書歸則贈公仍自課之性穎悟  
過目成誦年十二即讀完十三經贈公手錄國策史漢文字授  
公讀益之以魏晉六朝唐宋八家泉宋五子書貫弗融會下筆  
成章見者咸推為偉器贈公由豫章而皖江而金陵諸當道延  
請無虛日嗣兩江總督濟甯相國孫公聘贈公入幕挈公往公

與相國之孫毓淮同讀書即梧江同年也十九歲應縣試冠軍  
未及院試丁內艱哀毀骨立服闋應縣試再冠軍補弟子員食  
餼丙戌相國內召隨贈公就幕於浙繼之楚公未偕往授徒里  
中以供甘旨贈公旋丁張太夫人憂遂不復出壬辰鄉試中副  
車乙未京兆試報罷遂歸為負米計己亥舉於鄉十月贈公棄  
養盡哀盡禮以營窀穸甲辰成進士改庶士公以忝竊清華祿  
養未遂秋霜春露輒流涕歎數十年如一日也人咸謂贈公  
佐相國幕八年陰德所致故公與相國之孫同登第信非偶然  
乙巳散館授編修丙午充順天鄉試同考官丁未大考閱卷大  
臣列二等十六名進呈 御覽拔置第四擢中允己酉典試河

南以題旨錯誤移咨監臨奏請議處奉 旨革職留任 宣宗  
成皇帝龍馭上賓公感 九重特達之知攀號莫及 文宗御  
極恩詔照例開復處分庚戌遷司經局洗馬充 文淵閣校理  
本衙門撰文 實錄館總纂壬子大考二等遇缺題奏拜文綺  
之 賜擢侍講學士充武鄉試副考官癸丑轉光祿寺卿尋署  
禮部左侍郎直粵賊陷金陵分股北竄畿輔震動奉 命總辦  
京師團防公於是披肝瀝膽竭盡忠謹凡有關於國計民生安  
危利害知無不言、無不盡極陳各省蹂躪情形籌畫攻剿勝  
算連劾不職大吏與貽誤戎機者一歲之中章數十上會 朝  
廷屢詔求賢公則志舉平日所知之鴻才碩德名公鉅卿臚列

入告 先帝鑒公之誠俯加采納任以封圻畀以節錢卒能削  
 平大難戡定東南嗚呼公之所建白者大且遠已甲寅遷宗人  
 府丞乙卯陞內閣學士兼禮部侍郎銜丙辰陞工部右侍郎  
 充 國史館副總裁 文淵閣直閣事稽察中書科事務公以  
 受恩深重目擊時艱不忍緘默同塵取容當世雖平居謙卑自  
 牧和易近人而遇衆議盈廷是非所在則斷然不苟且以軍事  
 因循直言招忤遂不免有齟齬之者丁巳己未兩次于役 興  
 京承修 陵工庚申 文宗顯皇帝龍馭上賓奉 命恭理喪  
 儀公朝夕入內將事維謹未幾出為倉場總督先是河運改為  
 海運 天庾正供每歲幾三百萬石 欽差部臣駐天津驗收

轉運京倉自津門至大通橋三百里內居民藉此為生沿途偷  
 漏歲必短米一二十萬碩米數甚多補苴尚易癸丑軍興以後  
 江浙郡邑紛 淪陷南漕起運纜二十餘萬不及從前十分之  
 一而偷漏者如故公至則洞察情弊力加整頓深省倉虧甚鉅  
 而不敢遽發蓋咸豐癸丑以迄同治壬戌十年之間侍郎及監  
 督官凡數易率皆因循粉飾上下相蒙舉發則均干吏議且須  
 賠償米石公誼不忍為甘獨任其咎嘗語諸子曰吾居此如卧  
 於積薪之上恐不免貽子孫憂丁卯倉事起吏議綦嚴蒙 恩  
 左遷內閣學士攤賠米至兩萬石之多公設法屏當百計羅掘  
 以補倉虧雖七年不調意豁如也而遇大事則勇陳剴切不避

嫌怨譽、諤、一如其在。文廟時癸酉。穆宗毅皇帝親政。八月。命署吏部右侍郎。旋補戶部左侍郎。公受三朝恩遇。奮勉益圖報稱。職司天下出納軍事。未了度支浩繁。時虞匱乏。亟思酌益劑虛。主持大計。以節糜耗。仰屋而嗟。心力交瘁。而公遂一病不起矣。以甲戌九月十二日薨。享壽七十有三。遺疏上。聞。天子震悼。賜祭葬。如禮。公配陳夫人先公薨。篋室劉夫人亦先卒。生子三人。長陳壽。陳夫人出直隸邢臺縣知縣。次文壽。貽壽。劉夫人出文壽。工部郎中先卒。貽壽。刑部主事。孫四人。曾傳。曾寶。曾祐。曾順。公為京朝官垂三十年。無少長貴賤。皆傾蓋相與周旋。人罔不敬。公愛公者。天性肫摯。輕財好施。自奉儉

約。凡戚鄰故舊。所求則無弗應。其或遠在數千里外。友朋凋謝。音問濶絕。公則耿耿不能去懷。於其鄉之官京師者。詢之弗得其耗。則致書士大夫之官。於其鄉者。必得其消息。而後已。山林韋布里閭田野之夫。無論識與不識。啟門請見。公必延之。入不作寒暄語。卒問曰。客何所事。有事則已。無事則不待其求而已。心許之。陳壽告予曰。先大夫平時訓諸子曰。吾生平喜為人謀。尤急人之急。往於力無所願。惜故天之待我。亦總無過不去之事。生平城府洞開。尤樂與人為善。不屑於逆億。雖屢為人欺。而待之如故。曰。吾不逮吾父。吾猶知人之欺我也。而甘受其欺。若吾父則并不知人之欺已也。而卒亦莫肯相欺。度量相越。

有如此者嗚呼予聞陳壽言追思疇曩公之立朝建白卓然有  
古名臣風舉世以浮詐相矜乃獨視友朋為性命茲何幸其孤  
之能追述行誼闡揚先德也嗚呼公有子已將以某年月日葬  
某銘曰

公初釋褐主文愨家朝出宣武夜返西華我服公真絕無緣飾  
跌宕騷壇拍浮酒國羽書旁午乃奮經綸下而推轂上則從繩  
扈蹕木蘭陳書痛哭弗為利疚弗為威怵碩鼠之蠹視為畏途  
代人受過公則若愚嗟公豈愚惡彼谿刻履險如夷心安理得  
十年偃蹇再掌農曹騎箕而去巫陽下招歸侍  先皇神依  
金闕公言不朽公名不沒茫々人海所見惟公必昌厥後食報

豐隆我文匪諛公論罔異藏之幽宮儀型萬世

湖北布政使厲公墓誌銘并序

嗚呼濬頭來揚州獲與春明故舊朝夕過從以祛塵俗實為幸  
事乃彈指剎那紛、宿草傷離感逝無歲無之汜於今日又遭  
鳧庵方伯之喪腹痛心摧尚何言哉猶憶道光壬申己酉間公  
謁選入都與予一見即相契訂金石交曾不數月公之清泉予  
則銜恤歸里音問隔絕迨予在嶺南公已開藩楚北始通尺一  
公弟子堅大使需次廣州復得常訊起居頤一別十餘稔相思  
彌甚無何公賦遂初而予亦量移兩淮久離忽合蹤迹彌密春  
花秋月觴詠流連公之伉爽豪邁不減長安并轡時予方幸掉  
鞅追隨長保歲寒之約也丙子正月十七日視公病於寢室握



手歎歔淒然腸斷別才廿日孰意竟成永訣耶其孤渭青等以  
狀來乞為志墓予不敢以不文辭按狀公姓厲氏諱雲官字伯  
符又字鳧庵先世為浙之餘姚人宋南渡時遷居儀徵遂占籍  
焉曾祖朝容妣氏李祖長春妣氏夏晏陳考同勲副榜貢生廣  
東廉州府知府有合浦還珠之異載府縣志妣氏張繼妣氏張  
三代皆以公貴贈光祿大夫妣皆贈一品夫人廉州公生三子  
公齒居長嘉慶十三年十月二十三日生幼而穎敏隨廉州公  
官京師攻苦弗懈一時名士如建甯張際亮上元許宗衡山陽  
魯一同同邑吳熙載皆與上下其議論為文字之飲甚歡廉州  
公出守命公留京師應試連不得志於有司僅以謄錄從事史

館廉州公解組歸公造返省侍道光癸卯舉於鄉三上春官不  
第家中落不得已棄學而仕己酉選湖南清泉縣知縣前令殤  
於官虧公帑甚巨故事新舊交替必出具印結上游皆難之公  
則慨然曰某雖清貧終勝伊一籌如數應之上游以此重公聽  
斷能得其平民罔不悅咸豐壬子粵寇犯順衡州戒嚴羽書絡  
繹陶文節公方典郡與公共登陴固守衣不解帶者四十日得  
弗陷先是總督某公駐衡警報迭至某公恐令公具舟揚言將  
返長沙與撫軍面議軍事公曰此何時也衡為楚南門戶公一  
去則衡非我有矣若公云機要八百里急遞可以達於長沙也  
某公怫然曰非親往不可今夕便行公揣斷不可留乃要之曰

公決欲去緩急矣恃請留令箭三枝以備不虞許之遂行途次  
得撫軍書曰衡郡僅失臯將誰歸遂廢然而返抵郡百姓奮臂  
大呼擲瓦礫如雨下不得入城公復為從容勸諭乃得入當守  
城之日戒諸子曰城存與存城亡與亡臣子之分也設有不測  
汝等歸侍祖父母及汝母立志讀書勿墜家聲佗無所屬也以  
功擢直隸州未幾丁外艱直湘鄉曾文正公以侍郎督辦鄉團  
聞公名奏請奪情俾參戎幕乙卯賊欲取湘潭湘潭為米船屯  
集之所文正檄公諭商賈速運米至省濟軍食而免寇資因星  
夜往縣令以非出上官視為具文商賈亦懷疑觀望而賊氛日  
熾公曰若再不運行必為賊有我當以火箭焚之斷不留以予

賊其時勿怨勿悔衆乃行越日寇大至文正曰無此糧軍立飢  
潰且稍緩亦無及矣湖廣總督官文恭公偕湖北巡撫胡文忠  
公檄公辦理水師饋饗及軍裝局務二公文相倚畀會文忠營  
潰水師糧臺駐薊州遙見火光燭天兵卒駭竄勢岌々公命放  
火箭毋為賊有言畢湧身投江礮船亟救得免偵知文忠無恙  
亟往見籌戰守之策是年丁內艱復為二公奏留洊擢知府二  
公偕文正復疏請以道員記名奉 文廟硃批着以兩湖道員  
記名以期駕輕就熟洵異數也部議未經回籍補制者格於例  
不得補署會鹽法武昌道缺出二公檄代理遽拜湖南岳常澧  
道之 命復調湖北荊宜施道兼辦水陸兩路糧臺鄂境遍地

皆賊餉精奇絀公百計籌畫軍賴以濟泊郡縣次第收復錢糧  
捐輸各項文忠欲令徑解糧臺云此乃將士血戰而得者毋庸  
循例分解藩庫道庫公持不可曰如此則兩庫為虛設矣文忠  
堅執前說公曰非某不可勢有不合以本省所入之款供本省  
之用現所最急者莫如兵餉何不仍循定例分解由糧臺備公  
牘支領與解糧臺無異也無已則須先奏明而後敢收文忠慄  
然曰君言誠是吾誤矣既全楚肅清堅請回籍守制二公皆以  
辦理報銷君手出入無慮千百萬何言歸耶尋署湖北按察使  
兼攝布政使旋即真除文恭有事於黃州奏以公辦理總督事  
務巡撫嚴公樹森率師出省復奏以公辦理巡撫事務駁、將

大用矣乃同列有忌之者蜚語構陷上聞交文忠查辦事既  
得雪公復堅請回籍補制奏入從之服闋後文正及今合肥  
相國彭雪琴侍郎先後敦勸出山謂公曰君真欲高尚不能相  
助為理耶公答以心力交瘁竊祿可羞且宦海風波人心難測  
與其相爭弗如相讓咸憮然曰難進易退君子哉公姓坦夷胸  
無城府而又嚴重誠篤不苟言笑視天下人皆君子乍見者以  
為慄然難犯近而就之則固藹然可親也在官之日杜絕苞苴  
交友則勿欺然諾事無巨細必敬以將之其訓子曰遇疑難大  
事不動聲色熟思審慮而後發、必中節是之謂才是之謂識  
非讀書有得閱歷已深者不能作事固貴乎果決然不失以小

心則鄰於輕率固貴乎暇豫然不操以定見則失之依違唯於  
經權常變之交準情酌理而出之甯厚勿薄甯拙勿巧甯教人  
負我不可我負人也公有為而尤能有守曩主餉糈綜覈周至  
侵蝕浮冒之弊一掃而空故文忠文正皆深信之嘗謂處腥羶  
之地兢、自守不肯貽子孫憂平生所者唯籤贖丹青懷勺齋  
中物予見其大半率皆精妙絕倫足徵巨眼公告予曰所藏皆  
得之兵燹以後者歸田時囊橐蕭然惟書畫一船而已出崔莊  
田數十畝以為祭田六十初度止兒輩稱觴散米貧民自是歲  
以為常癸酉淮徐災民流離至邗上予設局捐賑公施棉衣全  
活甚衆生平於書無所不讀著述多散佚中年始擇可存者弄

諸篋笥乃賊至漢口悉燬於火無片紙隻字矣公長身玉立美  
鬚髯口不言阿堵終日課園丁蒔花種竹以為樂與予最莫逆  
每相遇談必移晷曠達磊落殆今之古人也公卒於光緒二年  
正月二十八日享年六十有九配史夫人繼配徐夫人亦先公  
卒側室陳孺人子六人渭青梯青綬青篠青紆青皆徐出復武  
陳出綬青出嗣胞叔與篠青皆先卒女子四人長殤次適沈次  
適張次適劉皆徐出孫九人某、將於某月某日與徐夫人合  
葬於某原徐夫人事行上元許宗衡別為志墓迺作銘曰  
槃、大才兮未竟厥施愴懷風木兮歸遂孝思衆人所驚兮視  
猶草芥海濶天空兮無罣礙卅載之交不可為不久兮七稔



